



文獻通考卷之二百五十

宋鄱陽 馬端臨 貴與 著

明蘄陽 馮天馥 應房 校刊

帝系考 帝號歷年

黃帝少典之子姓公孫名軒轅生於壽丘神農氏世衰諸侯相
侵伐蚩尤最暴黃帝徵帥諸侯擒殺蚩尤諸侯尊黃帝為天子
在位百年崩年百一十歲

帝顓頊高陽黃帝之孫昌意之子繼黃帝為天子在位七十八
年崩年九十八歲

帝嚳高辛黃帝之曾孫玄囂之孫蟠極之子繼顓頊為天子在
位七十年崩年百五歲

帝堯帝嚳之子姓伊祁名放勳帝嚳崩而長子摯代立封堯為
唐侯帝摯立不善在位九年唐侯德盛乃禪位于唐侯堯以甲

辰即位都平陽號陶唐氏在位七十年薦舜攝政又二十八年崩在位九十八年壽一百一十八首甲辰 盡癸未

帝舜顓頊七世孫瞽叟之子姓姚氏名重華年三十堯舉之年五十攝行天子事年五十八堯崩年六十一以丙戌歲代堯踐

帝位都蒲阪號有虞氏三十一年以丁巳歲禪于禹又八年崩壽一百歲首丙戌 盡癸亥

夏禹顓頊之孫鯀之子姓姒氏名文命治水有功舜使宅百揆年七十三以丁巳歲受舜禪即天子位都平陽安邑在位二十

七年癸未崩壽百歲
啓禹子以甲申嗣位九年壬辰崩

太康啓子以癸巳嗣位二十九年辛酉以盤遊無度為有窮后羿距于河失邦而崩

仲康太康子以壬戌嗣位十三年甲戌崩

帝相仲康子以乙亥嗣位二十八年壬寅為羿所弑 寒浞殺羿并滅相相之臣靡逃于有葛氏相之右還于有仍氏生少康

至四十二年壬午靡自有葛氏滅寒浞而立少康
少康相子以壬午滅寒浞嗣立二十二年癸卯崩

帝杼少康子以甲辰嗣立十七年庚申崩
帝槐杼子以辛酉嗣立二十六年丙戌崩

帝芒槐子以丁亥嗣立十八年甲辰崩
帝泄芒子以乙巳嗣立十六年庚申崩

帝不降泄子以辛酉嗣立五十九年己未崩
帝扃不降子以庚申嗣立二十一年庚辰崩

帝廛扃子以辛巳嗣立二十一年辛丑崩
帝孔甲廛子以壬寅嗣立三十一年壬申崩

帝皐孔甲子以癸酉嗣立十一年癸未崩

帝發臯子以甲申嗣立十九年壬寅崩

帝履癸是為桀以癸卯嗣立四十三年乙未以失道為殷湯所
伐戰于鳴條師敗湯放之南巢夏亡

右夏一十七世共四百五十九年首丁巳盡乙未內寒浞篡
位四十一年

殷湯契之十四世孫姓子氏名履以夏桀之三十五年丁丑即
諸侯位自商丘徙都亳以乙未伐桀滅夏即天子位十三年丁
未崩壽百歲

太甲湯孫以戊申嗣立三十三年庚辰崩

沃丁太甲子以辛巳歲嗣立二十九年巳酉崩

太庚沃丁弟以庚戌嗣立十五年甲戌崩

小甲太庚子以乙亥嗣立十七年辛卯崩

雍巳小甲弟以壬辰嗣立十一年癸卯崩

大戊雍巳弟以甲辰嗣立七十五年戊午崩

仲丁大戊子以巳未嗣立十三年辛未崩

外壬仲丁弟以壬申嗣立十五年丙戌崩

河亶甲外壬弟以丁亥嗣立九年乙未崩

祖乙河亶甲子以丙申嗣立十九年甲寅崩

祖辛祖乙子以乙卯嗣立十六年庚午崩

沃甲祖辛弟以辛未嗣立二十五年乙未崩

祖丁沃甲兄以丙申嗣立三十二年丁卯崩

南庚沃甲子以戊辰嗣立二十五年壬辰崩

陽甲祖丁子以癸巳嗣立七年巳亥崩

盤庚陽甲弟以庚子嗣立二十八年丁卯崩

小辛盤庚弟以戊辰嗣立二十一年戊子崩

小乙小辛弟以巳丑嗣立二十八年丙辰崩

武丁小乙子以丁巳嗣立五十九年乙卯崩

祖庚武丁弟以丙辰嗣立七年壬戌崩

祖甲祖庚弟以癸亥嗣立三十三年乙未崩

廩辛祖甲子以丙申嗣立六年辛丑崩

庚丁廩辛弟以壬寅嗣立二十一年壬戌崩

武乙庚丁子以癸亥嗣立四年丙寅崩

太丁武乙子以丁卯嗣立三年己巳崩

帝乙太丁子以庚午嗣立三十七年丙午崩

受辛帝乙子是為紂以丁未嗣立無道三十二年戊寅周武王伐之戰于牧野師敗受死殷亡

右殷二十八世共六百四十五年首乙未盡戊寅

周武王右稷十六世孫文王之子姓姬氏名發以商紂二十三年己巳嗣為西伯至己卯勝殷殺受即天子位七年乙酉崩壽

九十三

成王名誦武王子以丙戌嗣立三十七年壬戌崩歲四十四歲

康王名釗成王子以癸亥嗣立二十六年戊子崩

昭王名瑕康王子以己丑嗣立十一年己卯崩

穆王名滿昭王子以庚辰嗣立十五年甲戌崩

共王名繁扈穆王子以乙亥嗣立十二年丙戌崩

懿王名囂共王子以丁亥嗣立二十五年辛亥崩

孝王名辟方共王弟以壬子嗣立十五年丙寅崩

夷王名燹懿王子以丁卯嗣立十六年壬午崩

厲王名胡夷王子以癸未嗣立三十七年無道為國人所逐出

奔彘周召二伯行政謂之共和十五年癸酉崩于彘

宣王名靜厲王子以甲戌嗣立四十六年己未崩

幽王名宮涅宣王子以庚申嗣立無道十一年庚午為犬戎所

伐敗死

平王名宜臼幽王子以辛未嗣立五十一年辛酉崩

桓王名林平王孫以壬戌嗣立二十三年甲申崩

莊王名佗桓王子以乙酉嗣立十五年己亥崩

釐王名胡齊莊王子以庚子嗣立五年甲辰崩

惠王名閔釐王子以乙巳嗣立三十五年己巳崩

襄王名鄭惠王子以庚午嗣立三十二年壬寅崩

頃王名壬臣襄王子以癸卯嗣立六年戊申崩

匡王名班頃王子以己酉嗣立六年甲寅崩

定王名瑜匡王弟以乙卯嗣立二十一年乙亥崩

簡王名夷定王子以丙子嗣立十四年己丑崩

靈王名泄心簡王子以庚寅嗣立二十七年丙辰崩

景王名貴靈王子以丁巳嗣立二十五年辛巳崩子猛立為悼

王王子朝殺猛代立晉逐子朝立敬王

敬王名丐景王子以壬午嗣立四十四年乙丑崩

元王名仁敬王子以丙寅嗣立六年辛未崩

貞定王名介元王子以壬申嗣立二十八年己亥崩太子去疾

立為哀王王叔襲殺之代立為思王

思王以庚子嗣立為其弟少隗所殺

考王名少隗以辛丑嗣立十六年乙卯崩

威烈王名午考王子以丙辰嗣立二十四年己卯崩

安王名驕威烈王子以庚辰嗣立二十六年乙巳崩

烈王名喜安王子以丙午嗣立七年壬子崩

顯王名扁烈王弟以癸丑嗣立四十八年庚子崩

慎靚王名定顯王子以辛丑嗣立六年丙午崩

赧王名延慎靚王子以丁未嗣立五十九年乙巳為秦所攻王

奔秦盡獻其邑三十六秦受之是歲王崩周亡

右周三十七世共八百六十七年首己卯盡乙巳內共和行
政十五年

自周亡至秦始皇滅六國稱皇帝以前首丙午盡己卯共三
十四年

秦始皇伯翳之後莊襄王之子母呂不韋姬姓嬴氏名政以周
亡後九年甲寅嗣立為秦王立二十六年庚辰盡滅六國稱始
皇帝後十二年辛卯崩

二世皇帝名胡亥始皇少子以壬辰嗣立三年甲午為趙高所
弑立二世兄子嬰乙未漢高祖入秦子嬰降秦亡

右秦二世共十五年首庚辰盡甲午

漢太祖高皇帝沛豐邑中陽里人姓劉氏名邦父太公母媪以
秦二世元年壬辰年二十起兵為沛公乙未入關滅秦為漢王

五年己亥滅項籍即皇帝位都長安十二年丙午崩壽五十三

孝惠皇帝名盈高祖太子母呂后以丁未嗣立時年十七在位

七年癸丑崩壽二十四呂太后取後宮子以為帝子立之太后

臨朝稱制九年辛酉呂后崩諸呂作亂大臣誅之立文帝

太宗孝文皇帝名恒高祖中子母薄姬年五歲立為代王二十

二歲辛酉太尉周勃等迎立為皇帝在位二十三年甲申崩壽

四十六

孝景皇帝名啓文帝太子母竇皇后三十二歲乙酉嗣立

十六年庚子崩壽四十八

世宗孝武皇帝名徹景帝中子母王美人十六歲嗣立

十四年甲午崩壽七十一

改元十一

建元六

元光六

元朔六

元符六

元鼎六

元封六

太初四

天漢四

太始四

征和四

孝昭皇帝名弗陵武帝少子母趙婕妤八歲己未嗣立
在位十三年丁未崩壽二十二

改元三 始元六 元鳳六

中宗孝宣皇帝名詢武帝曾孫戾太子孫史皇孫子母王夫人
昭帝崩無嗣大將軍霍光立昌邑王賀賀無道廢之更立帝時
年十八丁未嗣立
在位二十五年壬申崩壽四十三

改元七 本始四 地節四 元康四 神爵四 五鳳四 甘露四 黃龍一

高宗孝元皇帝名奭宣帝太子母許皇后年二十七癸酉嗣立
在位十六年戊子崩壽四十三

改元四 初元五 永光五 建昭五 竟寧一

孝成皇帝名騫元帝太子母王皇后年二十己丑嗣立
在位二十六年甲寅崩壽四十六

改元七 建始四 河平四 陽朔四 鴻嘉四 永始四 元延四 綏和四

孝哀皇帝名欣元帝庶孫定陶恭王子母丁姬成帝無子立為
太子年二十乙卯嗣立
在位六年庚申崩壽二十六

改元二 建平四 元壽二

孝平皇帝名衍元帝庶孫中山孝王子母衛姬哀帝崩無子太
皇太后遣使迎立之年九歲丙辰嗣立
在位五年乙丑為王莽所鴆崩壽十四

改元一 元始五

王莽立孺子嬰自為攝皇帝三年至戊辰莽篡位

右西漢十一帝共二百一十四年始乙未盡戊辰

王莽以己巳篡位稱新室十五年癸未為漢兵所誅淮陽王

劉玄立二年為赤眉所滅莽玄共十六年

改元四 建國五 天鳳六 地皇三 更始二

東漢世祖光武皇帝名秀南陽人高祖九世孫父南頓今欽帝

以王莽篡位之十四年壬午起兵乙酉即皇帝位遷都洛陽時年二十九在位三十三年丁巳崩壽六十二

改元二 建武三十一
中元二

顯宗孝明皇帝名莊光武第四子母陰皇后年三十以戊午嗣立在位十八年乙亥崩壽四十八

改元一 永平十八

肅宗孝章皇帝名烜顯宗第五子母賈貴人年十九以丙子嗣立在位十四年戊子崩壽三十三

改元三 建初八
章和二
元和三

孝和皇帝名肇肅宗第四子母梁貴人年十歲以己丑嗣立在位十七年乙巳崩壽二十七

改元二 永元十六
元興二

孝殤皇帝名隆和帝少子生始百日嗣立丙午崩壽二歲

改元一 建初一

恭宗孝安皇帝名祐肅宗孫父清河孝王母左姬殤帝崩太后立為孝和皇帝嗣年十三以丁未嗣立在位一十九年乙丑崩壽三十二

改元五 永初七
建光一
元初六
延光四
永寧一

孝順皇帝名保安帝子母李氏年十一以丙寅嗣立在位十九年甲申崩壽三十

改元五 永建六
漢安二
建康一
陽嘉四
永和六

孝冲皇帝名炳順帝子母虞貴人年二歲以乙酉嗣立一年崩壽三歲

改元一 永嘉元

孝質皇帝名讚肅宗玄孫父渤海孝王母陳夫人冲帝崩皇太后詔嗣立時年八歲在位一年為梁冀所鳩崩年九歲

改元一 本初元

孝桓皇帝名志肅宗曾孫父蠡吾侯翼母偃氏質帝崩太后與
梁冀迎立之年十五歲以丁亥嗣立在位二十一年丁未崩壽
三十六

改元七 建和三 和平一 元嘉一 永興二

孝靈皇帝名宏肅宗玄孫父解瀆亭侯母董夫人桓帝崩無子
皇太后迎立之時年十二以戊申嗣立在位二十一年戊辰崩
壽三十四

改元四 建寧四 熹平六 光初六 中平六

孝獻皇帝名協靈帝中子母王美入靈帝崩董卓廢少帝為弘
農王立帝年九歲以巳巳嗣立在位三十二年以庚子禪位于
魏後十三年壬子崩壽五十四

改元四 初平四 興平二 建安二十四 延康一

右東漢十二帝共一百九十六年首乙酉盡庚子

蜀漢昭烈皇帝名備涿郡涿縣人景帝子中山靖王勝之後父
弘以建安十九年甲午取蜀二十四年巳亥稱漢中王辛丑即
皇帝位三年癸卯崩壽六十三

改元一 章武三

後主名禪昭烈帝子年十七以甲辰嗣立在位四十一年為魏
所滅

改元四 建興十五 延熙二十 景耀六 炎興元

右蜀漢二帝共四十三年首辛丑盡癸未

魏文帝沛國譙人姓曹氏名丕武帝操之太子以庚子受漢禪
即皇帝位時年三十二在位七年丙午崩壽四十

改元一 黃初七

明皇帝名叡文帝太子年二十二以丁未嗣立在位十三年巳

未崩壽三十五

改元三

太和六 景初三

青龍四

齊王名芳明帝養為子年九歲以庚申嗣立在位十四年癸酉為司馬師所廢時年二十三

改元二

正始九 嘉平五

高貴鄉公名髦文帝孫東海定王霖子司馬師既廢齊王迎立之年十四以甲戌嗣立在位六年己卯以討司馬昭不克遇弒年二十

改元二

正光二 甘露四

陳留王名奐武帝孫燕王字子司馬昭既弒高貴鄉公迎立之年十五以庚辰嗣立在位五年乙酉禪于晉

改元二

景元四 咸熙一

右魏五帝共四十六年首庚子盡乙酉

吳大帝吳郡富春人姓孫氏名權長沙太守堅之子討逆將軍策之弟漢末封吳王及魏王丕篡逆權以辛丑歲稱帝在位三十一年辛未崩壽七十一

改元六

黃武七 赤烏十三

黃龍三 太元一

嘉禾六 神鳳一

會稽王名亮太帝少子以壬申年嗣立在位六年為權臣孫綝所廢庚辰歲亮以謠言自殺時年十六

改元三

建興二 太平二

五鳳二

景帝名休太帝第六子會稽王亮之兄初封瑯琊王戊寅歲孫綝廢亮迎而立之在位六年甲申歲崩時年三十

改元一

永安六

歸命侯名皓太帝之孫太子和之子初封烏程侯景帝崩吳人迎而立之晉咸寧末武帝令將軍王濬等率兵伐之皓戰敗詣軍門請降太康元年徙皓洛陽封歸命侯在位十七年壽四十

晉書

卷之三十五

十

吳福

改元八 元興一 甘露一 寶鼎三 建衡三 右吳四帝 鳳凰三 太平一 天璽一 天紀四共六十年

晉世祖武皇帝河内温縣孝敬里人姓司馬氏名炎宣王之孫
文王之子以乙酉受魏禪即皇帝位時年二十九在位二十六
年庚戌崩壽五十五

改元三 太始十 咸寧五 太康十

孝惠皇帝名衷武帝第二子以庚戌嗣立時年二十一在位十
七年丙寅崩壽四十八

改元七 元康九 未康一 永寧一 太安二 永興二 光熙一

孝懷皇帝名熾武帝第二十五子惠帝時立為皇太弟帝崩以
丙寅嗣立時年二十三在位五年辛未劉曜石勒兵陷洛陽蒙
塵于平陽壬申遇害壽三十

改元一 永嘉五

孝愍皇帝名鄴武帝孫吳孝王晏之子洛陽傾覆奔長安眾推

為太子懷帝崩以癸卯即位時年十三在位四年丙子劉曜陷
長安丁丑遇害壽十八

改元一 建興四

右西晉四帝共五十二年首乙酉盡丙子

元皇帝名睿宣帝曾孫瑯琊恭王觀之子襲封鎮建鄴愍帝遇
害以丁丑嗣立時年四十一在位六年壬午崩壽四十七

改元三 建武一 太興四 永熙一

明皇帝名紹元帝太子以癸未嗣立時年二十四在位三年乙
酉崩壽二十七

改元一 太寧三

成皇帝名衍明帝太子以丙戌嗣立時年五歲在位十七年壬
寅崩壽二十二

改元二 咸和九 咸康八

晉書卷之三十五

康皇帝名岳成帝母弟以癸卯嗣立時年二十在位二年甲辰崩壽二十一

改元一 建元二

穆皇帝名聃康帝子以乙巳嗣立時年二歲在位十七年辛酉崩壽十九

改元二 未和十二
升平五

哀皇帝名丕成帝子以壬戌嗣立時年二十一在位四年乙丑崩壽二十五

改元二 隆和一
興寧二

廢帝名弈哀帝母弟哀帝崩皇太后詔立之以丙寅嗣立時年二十四在位六年辛未桓温廢之

改元一 太和五

簡文皇帝名顯元帝少子封會稽王桓温既廢海西公迎立之

以辛未嗣立時年五十一在位二年壬申崩壽五十三

改元一 咸安二

孝武皇帝名曜簡文帝子以癸酉嗣立時年十一在位二十四年丙申崩壽三十五

改元二 寧康三
太元二十一

安皇帝名德宗孝武帝長子以丁酉嗣立時年十五在位二十六年戊午崩壽三十七

改元三 隆安五
嘉熙十四
元興三

恭皇帝名德文安帝母弟以丁未嗣立時年三十四在位二年戊申禪位于宋遇害壽三十六

改元一 元熙二

右東晉十一帝共一百單四年首丁丑盡庚申

宋高祖武皇帝彭城綏興里人姓劉氏名裕以庚申受晉禪即

皇帝位時年五十七在位三年壬戌崩壽六十

改元一 永初三

少帝名義符武帝長子以壬戌嗣立時年十七在位二年癸亥徐羨之廢弒之壽十九

改元一 景平二

太祖文皇帝名義隆武帝第三子封宜都王少帝廢大臣立之以甲子嗣立時年十六在位三十年癸巳為元凶劭所弒壽四十六

改元一 元嘉三十

世祖孝武皇帝名駿文帝第三子封武陵王元凶劭弒逆入討賊以甲午嗣立時年二十四在位十一年甲辰崩壽三十五

改元二 孝建三 大明八

前廢帝名子業孝武帝長子以甲辰嗣立時年十六在位一年

荒淫無道遇弒壽十七

改元一 景和元

太宗明皇帝名彧文帝第十一子封淮陽王廢帝遇弒以乙巳嗣立時年二十六在位八年壬子崩壽二十四

改元二 泰始七 泰豫一

後廢帝名昱明帝太子以癸丑嗣立時年二十一在位四年丁巳以無道遇弒年二十五

改元一 元徽四

順皇帝名準明帝第三子封安成王廢帝殞蕭道成奉太后令立之以丁巳嗣立在位三年以己未禪于齊遇害壽十歲

改元一 昇明三

右宋八帝共六十年首庚申盡己未

齊太祖高皇帝東海蘭陵郡人姓蕭名道成以己未歲受宋禪

即皇帝位時年五十二在位四年壬戌崩壽五十六

改元一 建元三

世祖武皇帝名贍高帝長子以壬戌嗣立時年四十二在位十二年癸酉崩壽五十四

改元一 永明十一

廢帝名昭業武帝長孫立為太孫以癸酉嗣立為西昌侯鸞廢而弒之二十二歲再立海陵王昭文復廢之

改元二 隆昌 延興

高宗明皇帝名鸞始安貞王道生之子既廢二帝以甲戌嗣立時年四十二在位五年戊寅崩壽四十七

改元二 建武四 永泰二

廢帝名寶卷明帝第二子以己卯嗣立時年十六立三年己巳無道遇弒壽十九

改元一 永元三

和帝名寶融明帝第八子以辛巳嗣立禪于梁遇害壽十五

改元一 中興元

右齊六帝共二十二年首己未盡辛巳

梁高祖武皇帝南蘭陵中都里人姓蕭氏名衍以壬午歲受齊禪時年三十五在位四十八年己巳崩壽八十六

改元七 天監十八 普通七 中大通一 中大通二 中大通六 大同十一

太宗簡文皇帝名綱武帝第三子昭明太子薨立為太子以己巳嗣立三年辛未侯景廢而弒之壽四十九

改元一 大寶二

世祖孝元皇帝名繹武帝第七子封湘東王侯景篡立王僧辨等起兵討誅景以壬申嗣立在位三年甲戌為西魏所滅遇害壽四十七

改元一

承聖三

敬皇帝名方智元帝第九子封晉安王魏克江陵陳霸先等迎立之以乙亥嗣立在位二年丁丑禪于陳遇害壽十六

改元二

紹泰二
太平二

右梁四帝共五十六年首壬午盡丁丑

陳高祖武皇帝吳興長城下若里人姓陳氏名霸先以丁丑受梁禪時年五十四在位三年己卯崩壽五十七

改元一

未定一

世祖文皇帝名蒨武帝兄始興昭烈王之長子武帝受禪為臨川王以庚辰嗣立六年丙戌崩壽四十五

改元二

天嘉六
天康一

廢帝名伯宗文帝長子以丙戌嗣立在位三年戊子安成王顓廢之而自立未幾伯宗崩壽十九

改元一

光大

高宗宣皇帝名顓始興昭烈王次子以戊子嗣立時年四十在位十三年壬寅崩

改元一

太建十三

後主名叔寶宣帝太子以壬寅嗣立年三十在位七年己酉隋滅之

改元二

至德四
禎明三

右陳五帝共三十三年首丁丑盡己酉

後魏太祖道武皇帝其先世為代北鮮卑君長姓拓跋氏名珽以丙戌即代王位郊天改元時晉孝武太十三年戊戌取燕即帝位又十二年己酉為拓跋紹所弑壽三十九

改元四

登國十
天興六
皇始二
天賜四

太宗明元皇帝名嗣道武帝子以己酉嗣立在位十五年癸亥

崩壽三十二

改元三

未興五 泰常七

神瑞四

世祖太武皇帝名壽明元帝長子以甲子嗣立在位二十九年壬辰為宗愛所弑壽四十五

改元六

始光四 太平真君十一

神鷹四

永延五 正平三

延和三

高宗文成皇帝名濬太武帝嫡孫以壬辰嗣立在位十四年乙巳崩壽十六

改元三

興安三 和平六

興光五

顯祖獻文皇帝名弘文成帝長子以乙巳嗣立在位七年辛亥禪位于太子宏又五年丙辰崩壽二十三

改元二

天安二 皇興五

高祖孝文皇帝名宏獻文帝太子以辛亥受禪在位二十九年巳卯崩壽三十三

改元三

延興四 大和二十二

承明元

世宗宣武皇帝名恪孝文第二子為皇太子以巳卯嗣立在位十七年乙未崩壽三十三

改元四

景明四 承平四

正始四 延昌四

肅宗孝明皇帝名詡宣武帝第二子以乙未嗣立在位十四年戊申崩壽十九

改元五

熙平二 孝昌二

神龜二 武泰元

正光五

敬宗孝莊皇帝名子攸彭城王勰第二子封長樂王明帝崩爾朱榮立之以戊申嗣立三年庚戌誅爾朱榮為其黨所弑壽二十四

改元一

永安二

節閔帝名恭廣陵惠王羽之子少襲爵爾朱世隆既弑敬宗迎立之以辛亥嗣立一年壬子高歡廢而弑之壽二十四

改元一 普嘉三

孝武皇帝名修唐平武穆王懷之子封平陽王高歡既廢節閔奉勃海太守元朗為帝後廢之而立帝以壬子嗣立 在位三年至甲寅西奔長安崩壽二十五

改元一 未歷三

孝靜皇帝名善見清河王曹之世子孝武帝既西入關高歡奉帝立之為東魏以甲寅嗣立時年十一在位十七年庚午禪于齊未幾遇害壽二十八

改元四 天平四 元象元 興和四 武定八

文皇帝名寶炬孝文帝之孫京兆王愉之子封南陽王孝武崩宇文泰立之以甲寅嗣立 在位十八年辛未崩壽四十五

改元一 大統十八

廢帝名欽文帝長子以辛未嗣立 在位三年癸酉為宇文泰所

廢尋弒之壽十六

不改元

恭皇帝名廓文帝第四子以甲戌嗣立三年丙子禪于周末幾周人殺之壽二十一

不改元

右魏十五帝共一百七十一年首丙戌盡丙子

北齊顯祖文宣皇帝勃海修人姓高氏名洋神武王歡之次子以庚午受魏禪即皇帝位 在位十年己卯崩壽三十一

改元一 天保十

廢帝名殷文宣太子以己卯嗣立一年庚辰常山王演廢之而自立尋遇害壽十五

改元一 乾明

孝昭皇帝名演神武第六子以庚辰嗣立一年崩壽二十七

改元一 皇建四

世祖武成皇帝名湛神武第九子辛巳嗣立五年乙酉禪位于太子緯稱太上皇又四年戊子崩壽三十二

改元二 太寧一 清河四

後主名緯武成帝長子以乙酉嗣立任位十三年丁酉為周所滅壽三十三

改元二 天統五 武平八

右北齊五帝共二十八年首庚午盡丁酉

周閔帝名覺代郡武川人文王泰之長子以丙子受魏禪一年丁丑為晉公護廢而弒之壽十六

世宗明皇帝名毓文王泰次子晉公護廢閔帝迎立之以丁丑嗣立四年庚辰崩壽二十七

改元二 武定二 武成二

高祖武皇帝名邕文王第四子庚辰嗣立任位十九年戊戌崩壽三十六

改元四 保定五 天和六 宣政元

宣皇帝名贊武帝長子以戊戌嗣立己亥傳位太子稱天元庚子崩壽二十二

改元一 大象

靜帝名衍宣帝長子庚子嗣立辛丑禪于隋遇害壽九歲

右周五帝共二十六年首丙子盡辛丑

隋高祖文皇帝弘農華陰人姓楊氏名堅以辛丑受魏禪在位二十四年甲子崩壽六十四

改元二 開皇二十 仁壽四

煬皇帝名廣高祖次子以甲子嗣立任位十五年戊寅無道遇弒壽五十

改元一

大業

恭皇帝名侑煬帝孫元德太子之子唐公李淵入長安立之以
丁丑嗣位戊寅禪于唐封為鄴國公武德二年崩壽十五

改元一

義寧

右隋三帝共三十八年首辛丑盡戊寅

唐高祖神堯大聖大光孝皇帝隴西成紀人姓李氏名淵以辛
丑自太原留守起兵入長安戊寅受隋禪即皇帝位時年五十
三在位九年丙戌傳位于太宗稱太上皇又十年乙未崩壽七
十一

改元一

武德九

太宗文武大聖大廣孝皇帝名世民高祖次子母竇皇后初封
秦王太子建成誅立為皇太子以丙戌嗣立時年二十九在位
二十三年己酉崩壽五十二

改元一

貞觀二十三

高宗天皇大聖大弘孝皇帝名治太宗第九子母長孫皇后初
封晉王太子承乾廢立為皇太子以己酉嗣立時年二十二在
位三十四年癸未崩壽五十六

改元十四

永徽七
乾封三

顯慶六
總章三

龍朔四
咸亨五

麟德三
上元三

儀鳳三
開耀二

調露二
永淳二

弘道二

中宗孝和大聖大昭孝皇帝名顯高宗第七子母武皇后為皇
太子癸未嗣立甲申武后廢之後二十二年乙巳復辟在位五
年庚戌為韋后所弒壽五十五

改元三

神龍二
唐隆元

景龍二

武后改元十二

光宅元
長壽二

垂拱四
延載元

天冊萬歲元
聖曆二

天壽二

萬歲通天元
久視元

神功元
長安四

睿宗玄真大聖大興孝皇帝名旦高宗第八子母武皇后封豫

王武后既廢中宗立之臨朝至庚寅降立為皇嗣中宗復辟封相王韋后弒逆臨淄王隆基誅之迎立帝以庚戌即位二年壬子傳位于太子隆基後四年丙辰崩壽五十五

改元二 太極 延和

玄宗至道大聖大明孝皇帝名隆基睿宗第三子母竇皇后封臨淄郡王庚戌韋后弒逆以兵討誅之睿宗即位立為皇太子以壬子嗣立時年二十七在位四十四年乙未禪位于太子亨後七年壬寅崩壽七十八

改元三 先天元 開元二十九 天寶十四

肅宗文明武德大聖大宣孝皇帝名亨玄宗第三子母楊皇后天寶中為皇太子丙申嗣立時年四十五在位七年壬寅崩壽五十二

改元四 至德二 乾元一 上元二 寶應二

代宗睿文孝武皇帝名豫肅宗太子母武皇后以壬寅嗣立時年三十六在位十八年巳未崩壽五十四

改元三 廣德二 永泰二 大曆十二

德宗神武孝文皇帝名适代宗太子母沈皇后以巳未嗣立時年三十八在位二十六年甲申崩壽六十四

改元三 建中四 興元元 貞元二十

順宗至德弘道大聖大安孝皇帝名誦德宗太子母王皇后以甲申嗣立一年崩壽四十六

改元一 永貞

憲宗昭文章武大聖至神孝皇帝名純母王皇后順宗太子以丙戌嗣立時年二十八在位十五年庚子崩壽四十三

改元一 元和十四

穆宗睿聖文惠孝皇帝名恒憲宗第三子母郭皇后以庚子嗣立時年二十六在位五年甲辰崩壽三十

改元一 長慶四

敬宗睿武昭愍孝皇帝名湛穆宗長子母王皇后以甲辰嗣立時年十六在位三年丙午為宦官蘇佐明等所弑壽十八

改元一 寶曆三

文宗元聖昭獻孝皇帝名昂穆宗第二子母蕭皇后封江王敬宗崩王守澄等迎立之以丙午嗣立時年十八在位十四年庚申崩壽三十二

改元二 太和十 開成五

武宗至道昭肅孝皇帝名炎穆宗第五子母韋皇后封穎王文宗崩仇士良等迎立之以庚申嗣立年二十七在位六年丙寅崩壽三十三

改元一 會昌六

宣宗聖武獻文孝皇帝名忱憲宗第十二子母鄭皇后封光王武宗崩中官迎立之以丙寅嗣立時年二十七在位十三年己卯崩壽五十

改元一 大中十三

懿宗昭聖恭惠孝皇帝名漙宣宗太子母臯皇后以己卯嗣立

改元一 咸通十四

僖宗惠聖恭定孝皇帝名儼懿宗第五子母王皇后立為皇太子以癸巳嗣立時年二十在位十六年戊申崩壽三十六

改元五 乾符五 廣明元 中和四 光啓三 文德元

昭宗聖穆景文孝皇帝名晔懿宗第七子母王皇后封壽王以戊申嗣立十六年甲子為朱全忠所弑壽三十八

改元七 龍紀二 大順三 景福三 乾寧五 光化四 天復四 天祐元

哀皇帝名祝昭宗第九子母何皇后封暉王昭宗遇弑以甲子

嗣立三年丁卯禪于梁明年遇害壽十七

改元 盡天祐四年

右唐二十帝共二百九十年首辛丑盡丁卯內武氏二十二年

後梁太祖神武元聖孝皇帝單州碭山縣人姓朱氏名晃初名溫賜名全忠以丁卯受唐禪即皇帝位年五十六在位六年壬申為其子郢王友珪所弑年六十一

改元二 開平四 乾化二

末帝名瑱太祖第四子母張皇后封均王友珪弑逆討誅之以癸酉嗣立在位十一年癸未唐兵入汴為其下所弑年三十六

改元三 乾化五 龍德二 山明六

右後梁二帝共十七年首丁卯盡癸未

後唐莊宗光聖神閔孝皇帝其先沙陀人唐賜姓李氏名存勗

武帝 克用子 以癸未即皇帝位滅梁在位四年丙戌兵亂中流矢

崩壽四十二

改元一 同光四

明宗聖德和武欽孝皇帝代北金鳳城人姓李氏名亶以丙戌嗣立在位八年癸巳崩壽六十七

改元二 天成四 長興四

閔帝名從厚明宗第三子封宋王癸巳嗣立甲午潞王兵入汴廢之而自立 壽二十一

改元一 廣順

末帝名從珂本姓王氏明宗養為子封潞王以甲午廢閔帝即位三年丙申石敬瑭舉兵犯闕帝兵敗自焚死壽五十二

改元一 清泰三

右後唐四帝共十四年首癸未盡丙申

後晉高祖聖文章武明德孝皇帝太原汾陽里人姓石氏名敬瑭丙申以北京留守舉兵入洛即皇帝位在位七年壬寅崩壽五十

改元一

天福七

少帝名重貴本高祖從子封齊王以壬寅嗣立在位四年丙午契丹入汴北遷卒於黃龍府壽三十四歲

改元二

天福二 開運二

右後晉二帝共十一年首丙申盡丙午

後漢高祖睿文聖武昭肅孝皇帝太原人姓劉氏名高初名知遠契丹入中國以丁未即皇帝位于晉陽繼遷于汴在位二年戊申崩壽五十四

改元一

乾祐二

隱帝名承祐高祖第二子封周王以戊申嗣立三年庚戌郭威

擁兵犯闕遇弒壽二十

右後漢二帝共四年首丁未盡庚戌

後周太祖聖神恭肅文武孝皇帝邢州堯山人姓郭氏名威辛亥以鄴都留守入汴即皇帝位三年癸丑崩壽五十一

改元一

廣順

世宗睿武孝文皇帝本姓柴氏名榮太祖養子封晉王以甲寅嗣立在位六年己未崩

改元一

顯德六

恭帝名宗訓世宗子封梁王以己未嗣立庚申禪于宋後十四年癸酉崩壽二十一

右周三世共九年首辛亥盡己未

宋太祖英武聖文神德皇帝其先涿郡人皇考始遷洛陽姓趙氏名匡胤父周龍捷左廂都指揮使弘毅追謚宣祖母昭憲杜

太后庚申以殿前都檢點受周禪即皇帝位時年三十三在位十七年丙子崩壽五十

改元三

建隆三
開寶九

乾德五

太宗神功聖德文武皇帝名炅初名匡義母昭憲杜太后以丙子嗣立時年三十七在位二十二年丁酉壽五十九

改元五

太平興國八
端拱二
淳化五

雍熙四
至道三

真宗文明章聖元孝皇帝名恒初名元侃太宗第三子母元德李太后立為皇太子以丁酉嗣立年二十九在位二十六年壬

戌崩壽五十五

改元五

咸平六
天禧五

景德四
乾興元

太中祥符九

仁宗神文聖武明孝皇帝名禎初名受益真宗太子母莊懿李太后以壬戌嗣立時年十二在位四十二年癸卯崩壽五十四

改元九

天聖九
康定元

明道二
慶曆八

景祐四
皇祐五

寶元二
至和二

嘉祐八

英宗獻文肅武宣孝皇帝名曙初名宗實濮安懿王允讓之子詔立為皇子以癸卯嗣立時年二十三在位五年丁未崩壽三十八

改元一

治平四

神宗英文烈武聖孝皇帝名頊英宗太子母宣仁高皇后以丁未嗣立時年十九在位十九年乙丑崩壽三十八

改元二

熙寧十
元豐八

哲宗欽文睿武昭孝皇帝名煦初名傭神宗太子母欽聖朱太妃以乙丑嗣立時年十歲在位十五年庚辰崩壽二十五

改元三

元祐八
元符三

紹聖四

徽宗聖文仁德顯孝皇帝名佶神宗第十一子母欽慈陳太后初封端王哲宗崩以庚辰嗣立年十九歲在位二十五年乙巳

禪位于太子丁未金虜陷中原北遷後九年乙卯崩于五國城
壽五十四

改元六 建中靖國元 政和七 重和元 崇寧五 宣和七 大觀四

欽宗恭文順德仁孝皇帝名桓徽宗太子母顯恭王皇后以乙
巳受內禪即位時年二十五二年金人陷中原丁未北遷後三
十四年庚辰崩壽六十一

改元一 靖康二

高宗聖神武文昭仁憲孝皇帝名構徽宗第九子母顯仁韋太
后初封康王金人陷中原二帝北狩以丁未嗣立于南京時年
二十一在位三十六年壬午內禪于太子又二十五年丁未崩
壽八十一

改元二 建炎四 紹興二 十二

孝宗哲文神武明聖成孝皇帝名昀初名瑗太祖之裔高宗以
為太子壬午受內禪即位時年三十六在位二十七年己酉內
禪于太子又五年癸丑崩壽六十八

改元 隆興二 淳熙十六 乾道九

光宗憲仁聖哲慈孝皇帝名惇孝宗第三子母成穆郭皇后立
為太子己酉受內禪時年四十三在位五年甲寅內禪又六年
戊午崩壽五十四

改元一 紹興五

寧宗仁文哲武恭孝皇帝名擴光宗第二子母慈懿李皇后立
為太子甲寅即位時年二十六在位三十一年甲申崩壽五十
七

改元四 慶元六 嘉泰四 開禧三 嘉定十七

理宗烈文仁武安孝皇帝名昀初名貴誠沂靖惠王之子寧宗
以為皇子甲申嗣立時年二十一在位四十一年甲子崩壽六

改元八

寶慶二 紹定六 端平三 嘉熙四 淳祐十二 寶祐六 開慶元 景定五

度宗端文明武景孝皇帝名昀福王之子理宗立為太子甲子嗣立時年二十五在位十一年甲戌崩壽三十五

改元一 咸淳十

文獻通考卷二百五十

文獻通考卷之二百五十一

宋鄱陽 馬 端臨 貴與 著

明蘄陽 馮 天馭 應房 校刊

帝系考 太上皇太皇太后皇太后 母后臨朝稱制及推尊私親父

母后臨朝稱制及推尊私親父 見宗廟門此不錄

虞舜踐帝位乃載天子旌旗往朝瞽瞍唯謹以子道

孟子咸丘蒙問曰語云盛德之士君不得而臣父不得而子

舜南面而立堯帥諸侯北面而朝之瞽瞍亦北面而朝之舜

見瞽瞍其容有蹙孔子曰於斯時也天下殆哉岌岌乎不識

此語誠然乎哉孟子曰否此非君子之言齊東野人之語也

堯老而舜攝也堯典曰二十有八載放勳乃徂落百姓如喪

考妣三年四海遏密八音孔子曰天無二日民無二王舜既

為天子矣又帥天下諸侯以事堯三年喪是二天子矣 朱子集註

咸丘蒙孟子弟子語古語也變聲感不自安也豈豈不安貌言人倫乖亂天下將危也齊東野語國東鄰也孟子言堯但老而不治事而舜攝天子之事堯時舜未嘗即天子位咸丘蒙堯何由北面而朝之乎又引書及孔子之言以明之咸丘蒙

曰舜之不臣堯則吾既得聞命矣詩云普天之下莫非王土率土之濱莫非王臣而舜既為天子矣敢問瞽瞍之非臣如

何曰是詩也非是之謂也勞於王事而不得養父母也曰此莫非王事我獨賢勞也不臣堯不以堯為臣使北面而朝也詩小雅北山之篇普徧也率循也此

詩今毛氏序云役使不均已勞於王事而不得養其父母焉其詩下文亦云大夫不均我從事獨賢乃作詩者自言天下皆王臣何為獨使我以賢才而勞苦乎非謂天子可臣其父也孝子之至莫大乎尊親尊親

之至莫大乎以天下養為天子父尊之至也以天下養養之至也詩曰永言孝思孝思維則此之謂也言瞽瞍既為天子

之養此舜之所以為尊親養親之至也豈有使之北面而朝之理乎詩大雅下武之篇言人能長言孝思而不忘則可以為天下法則也書曰祗載見書大禹謨篇也祗敬也載事也瞽瞍亦允若是為父不

得而子也懼之貌允信也若順也言舜事瞽瞍往而見之敬謹如此瞽瞍亦信而順之也孟子引此而言瞽瞍不能以不善及其子而反見化於其子則是所謂父不得而子者而非如咸丘蒙之說也

漢高祖六年尊太公為太上皇

上歸櫟陽五日一朝太公太公家令說太公曰天亡二日土

無二玉皇帝雖子人主也太公雖父人臣也柰何使人主拜人臣如此則威重不行後上朝太公擁彗李奇曰為恭也如

日彗所以掃迎門却行而退也師古也也也柰何以我亂天下法於是上心善家令言賜黃金五百斤

夏五月丙午詔口人之至親莫親於父子故父有天下傳歸於子子有天下尊歸於父此人道之極也前日天下大亂兵

革並起萬民苦殃朕親披堅執銳自帥士卒犯危難平暴亂立諸侯偃兵息民天下大安此皆太公之教訓也諸王通侯

將軍群卿大夫已尊朕為皇帝而太公未有號今尊太公曰

太上皇

師古曰太上極尊之稱也皇君也天子之故曰皇不預治國故不言帝也

後漢荀悅曰孝經云故雖天子必有尊也言有父也王者父事三老以示天下所以明孝也無父猶設三老之禮况其存者乎孝莫大於嚴父故子尊不加於父母家令之言於是過矣

晉愍懷太子令問中庶子劉寶云太公家令說太公為是為非對曰荀悅論貶家令為非臣以為悅不識高帝意高帝雖貴為天子事父不失子之禮時即位已六年而不加父號是以家令言雖父乃人臣也言無可尊敬當與人臣同禮欲以此感動之帝聞家令言乃悟即立號太上皇得人子尊父之道若不聞家令言父終無號矣家令說是也

師古亦以為善其發悟已心因得尊崇父號非善其令父敬已

漢因秦之稱號帝母稱皇太后祖母稱太皇太后

高祖崩惠帝即位尊呂皇后為皇太后太后首末並見惠帝崩

太后取後宮子名為孝惠子立之年幼太后臨朝稱制師古曰

言一曰制書二曰詔書制書者謂為制度之命也非皇后所得稱今呂太后臨朝行天子事緣此高機故稱制詔

子呂台產祿台子通四人為王封諸呂六人為列侯四年少帝

自知非皇后子出怨言太后廢之立恒山王弘為帝八年皇太

后崩諸呂謀亂大臣誅之

文帝立尊母薄姬為皇太后姬初為薄氏侯者一人後文帝崩二歲

孝景前二年崩葬南陵用呂后不合葬長陵故特自起陵近文帝

景帝立尊母竇皇后為皇太后竇氏侯者三人後景帝六歲以

武帝元光六年崩

武帝立尊母王皇后為皇太后王氏田氏侯者凡三人後景帝

十五歲元朔三年崩合葬陽陵

昭帝崩霍光迎立昌邑王賀尊上官皇后為皇太后既廢賀立

宣帝尊太后為太皇太后以建昭二年崩合葬平陵

元帝立尊孝宣王皇后為皇太后元帝崩成帝即位為太皇太

后王氏列侯二人閔內侯一人時成帝母亦姓王氏故世號太

皇太后為中成太后未始元年崩合葬杜陵稱東園師古曰雖

別為墳王后陵次宣

成帝立尊母王皇后為皇太后以弟平陽侯鳳為大司馬大將軍

領尚書事又封太后同母弟崇為侯鳳庶弟譚為閔內侯後五

年又封舅譚商立根逢時皆為侯世謂之五侯後又封兄二莽

為新都侯哀帝即位尊為太皇太后哀帝崩無子太皇太后以

莽為大司馬立平帝太后臨朝委政於莽群臣希旨奏請莽為

安漢公宰衡平帝崩莽徵宣帝玄孫嬰為帝居攝踐祚既而即

真號太后為新室文母年八十四建國五年崩合葬渭陵

司徒掾班彪曰三代以來春秋所記王公國君與其失世

稀不以女寵漢興后妃之家呂霍上官幾危國者數矣及

王莽之興由孝元后歷漢四世為天下母享國六十餘載

群弟世權更持國柄五將十侯卒成新都位號已移於天

下而元后拳拳猶握一璽不欲以授莽婦人之仁慈夫

致堂胡氏曰外戚之禍在王氏然漢初功臣平勃等預有

臯焉高祖崩倡言呂后與帝共定天下帝王諸劉后王諸

呂無不可者共定之語本出酈寄於是大裂土疆以王諸

呂侵弱劉氏罪一也孝惠即世聽張辟疆之說縱諸呂居

中用事專權禁闔其幹兵柄上以媚太后下以安已身由

是諸呂不可制罪二矣高后即世雖能誅諸呂立孝文然

自茲以往母后習見前世用事例為出閫之言觀大臣議

所言皆曰齊王高帝孫然母家駟鈞惡淮南王母家又惡

獨代王母家薄氏謹良遂立孝文則平勃之徒畏母后深

矣蓋漢母后預政不必臨朝少主雖長君亦然竇太后好
黃老惡儒士儒士多不得進趙綰王臧欲助上興制度則
發其姦利寢之竇嬰兒子也惡之則除門籍喜之則為相
梁孝王愛之則誦言請立為嗣不顧太宗之重王太后於
灌夫罵坐則不食論棄市韓嫣帝所貴也太后欲殺之則
帝不能救可謂司晨預事矣武帝欲立昭則先殺鈞弋夫
人馴致王氏篡奪其所從來者遠矣

先公曰今按胡氏之說足以盡西京外戚貽禍之本末矣
嘗因是而極論之天地間有陽不能無陰陰而乘陽則宇
宙分裂人極隳亡矣歐陽公謂宦官之禍甚於女子蓋為
唐末一代言之耳以古今大勢論則女禍深矣少女子能
蠱惑人主以亡國老女子能崇長外戚以亡國三代之亡
國皆由此物矣周之東遷以褒姒周雖不亡於此已衰於

此矣秦后始有宣太后穰侯之專莊襄悅美姬以易其宗

漢高帝起於閭閻呂氏初無功於王業也而漢初諸人之

論每以為呂氏雅故本推轂高帝就天下田生語註謂翼

車之行助又謂呂后與高帝共定天下謂高是以諸呂之

心自謂與諸劉等憫然有取而代之之意而後動於惡中

間霍氏擁昭立宣陰妻邪謀特覺之早耳而終不免莽新

之亂焉曹魏之見篡於司馬氏也一再廢弒專以母后為

之主及晉武帝平吳之後耽惑女寵楊賈實召五胡亂華

之禍天下既為南北矣齊陳以女色亡元魏以淫后亡隋

文帝起外戚以篡周唐高祖主外戚竊宮嬪以取隋太宗

寵武才人開聚麀之醜子孫殲焉祿山之起為太真妃也

唐雖未亡於此而已衰於此矣河朔失而勁兵亡東南虛

而蠻禍起非權輿於天寶末乎朱梁以女寵開于禍而亡

後唐莊宗以劉后殺功臣勒軍賞而亡皆女子之爲也

哀帝立尊趙后爲皇太后趙氏侯者二人哀帝爲太子頗得趙太后力傳太后恩趙太后趙太后亦歸心故成帝母及王氏皆怨之哀帝崩王莽白太后太后詔有司曰前皇太后與昭儀俱封帷幄姊弟專妬殘滅繼祀以危宗廟貶爲孝成皇后徙北宮後月餘復詔廢爲庶人就其園自殺立十六年哀帝旣爲太子成帝母王太后欲令傳太后哀帝祖母丁姬哀帝母十日一至太子家成帝曰太子承正統共養陛下不得復顧私親王太后曰太子小而傳太后抱養之令至太子家以乳母恩耳於令傳太后得至太子家丁姬以不小養太子獨不得哀帝即位王太后詔令傳太后丁姬十日一至未央宮後下詔尊定陶共王爲共皇尊傳太后爲共皇太后丁姬爲共皇后各置左右詹事食邑如長信宮中官後歲餘下詔曰漢家之制推親親以顯尊尊定陶共

皇之號不宜復稱定陶其尊共皇太后爲帝太后丁姬爲帝太后復又更號帝太后爲皇太后太后稱永信宮帝太后稱中安宮而成帝母太皇太后本稱長信宮成帝趙后爲皇太后並四太后各置少府太僕秩皆二千石傅氏侯者六人傅太后旣尊後尤驕元壽元年崩合葬渭陵稱孝元傅皇后丁氏侯者二人太后建平二年崩起陵恭皇之園哀帝崩王莽秉政使有司舉奏丁傅罪惡皆免官爵徙故郡貶傅丁二太后號夷其陵東漢明帝即位尊陰皇后爲皇太后永平七年崩在位二十四年年六十合葬原陵

肅宗即位尊馬皇后爲皇太后帝欲封爵諸舅太后不聽建初四年崩在位二十三年年四十餘合葬顯節陵和帝即位尊竇皇后爲皇太后太后臨朝兄憲等並顯貴擅威權後密謀不軌發覺誅九年太后崩在位十八年臨朝四年未

葬而帝母梁貴人姊嬃反一計上書陳貴人爲后所陷枉殺之狀

太尉張輔等請依光武黜呂太后故事貶太后尊號不宜合葬

先帝帝手詔曰竇氏雖不遵法度而太后常自減損朕奉事十年深惟大義禮臣子無貶尊上之文恩不忍離義不忍虧按前

世上官太后亦無降黜其勿復議於是合葬敬陵

和帝崩長子平原王有疾而諸皇子天歿前後十數後生者輒

隱祕養於人間殤帝生始百日竇皇后迎立之尊后爲皇太后

太后臨朝殤帝崩太后定策立安帝猶臨朝政以連遭大憂百姓苦役乃詔減除浮費錄冤獄自太后臨朝水旱十載四夷外

下復平歲還豐穰永寧二年崩在位二十年臨朝十七年年四

十一合葬順陵

范曄論曰鄧后稱制終身號令自出術謝前政之良身闕

明辟之義前政謂周公也辟君也尚書曰朕後子明辟言周公攝位復還成王今太后不還故曰明辟也

至使嗣主側目歛衽於虛器器謂神器也直生懷慙懸書於

象魏象魏闕也直生杜根根借之儀者殆其惑哉遂使

太后不還政於安帝近可感也然而建光之後王柄有歸太后建光

名賢戮辱便孽黨進帝寵用乳母王聖及其女伯榮出入

權引謗所幸者非已焦心卹患自強者唯國以言朝特朝權

所幸不爲已是以班母一說闔門辭事太后兄大將軍騰

安帝閻皇后與兄顯及江京請皇太子保廢爲濟陰王帝崩爲

皇太后欲久專國政貪立幼年與顯等定策禁中迎濟北惠王

子北鄉侯懿立為皇帝太后臨朝蔡邕獨斷曰火帝即位太后即代攝臨前殿朝群臣太后

東面少帝西面群臣奏事上書皆為兩通一詣后一詣火帝少帝立二百餘日而薨京白太

后徵濟北河間王子未至而中黃門孫程等合謀殺江京等立

濟陰王是為順帝顯等皆伏誅遷太后於離宮家屬徙北景明

年太后崩在位十二年合葬恭陵順帝崩梁皇后無子美人虞

氏子炳立是為冲帝尊后為皇太后太后臨朝冲帝尋崩復立

質帝猶秉朝政時寇盜羣擾亂賦歛煩數官民困竭太后夙

夜勤勞推心核賢委任太尉李固等拔忠良誅貪匿崇節儉寇

夷消弭海內肅然而尤大將軍冀鸚鵡弑質帝專權暴忌數以邪

說疑誤太后遂立桓帝而誅李固天下失望和平元年歸政尋

崩在位十九年臨朝六年年四十五合葬憲陵

桓帝既立追尊本生父蠡吾侯翼為孝崇皇梁太后既崩乃追

尊妾母夏氏為孝崇皇后遣司徒持節奉策授璽綬賚乘輿器

服備法物宮曰永樂置太僕少府以下皆如長樂宮故事漢官儀曰

帝祖母稱長信宮帝母稱長樂宮故有長信少府長樂少府及職吏皆宦官為之又置虎賁羽林衛士

起宮室分距鹿九縣為后湯沐邑在位三年元嘉二年崩以帝

弟平原王石為喪主葬儀比皇后

桓帝崩無子竇皇后為皇太后臨朝定策立解瀆侯宏是為靈

帝太后父大將軍武謀誅宦官而中常侍曹節等矯詔殺武遷

太后於南宮雲臺家屬徙北景竇氏雖誅帝猶以太后有援立

之恩朝于南宮親饋上壽供養資奉有加於前熹平元年崩立

七年合葬宣陵

靈帝既立追尊本生父解瀆侯世長為孝仁皇夫人董氏為孝

仁皇后迎至京師居南宮嘉德殿宮稱永樂及竇太后崩始預

政使帝賣官求貨帝崩何太后臨朝孝仁后欲參預政事太后

輒禁塞之忿惠太后與兄何進謀奏蕃后故事不得留京師請
遷本國收其兄子重免官重自殺孝仁后以憂崩在位二十二
年

靈帝崩皇子辨即位尊母何皇后為皇太后臨朝后兄大將軍
進欲誅宦官不克反為所害董卓將兵入洛陽遂廢少帝而立
協是為獻帝遷太后於永安宮遇鳩而崩在位十年

范曄論曰自古雖王幼時親王家多釁必委成冢宰簡求
忠良未有專任婦人斷割重器唯秦遷太后始攝政事故

穰侯權重於昭王家富於嬴國太后昭王母也號宣太后
史記曰昭王立年少自知

事以從母弟魏冉為將軍任政封為穰侯太后攝政始於此也漢仍其謬知患莫改東京
皇統屢絕權歸女主外立者四帝安質臨朝者六后章帝

太后和熹鄧太后安思閻太后順烈梁太后桓思竇太后靈思何太后也莫不定策惟帝委事
父兄貪孩童以久其政抑明賢以專其威周禮慕人掌惟

女注曰帷帝中坐上承塵也殤帝崩鄧太后與兄熹等定
立安帝年十三冲帝崩梁太后與兄冀迎立質帝年八歲

質帝崩太后與父武迎立靈帝年十二帝崩竇太后與父武迎立靈帝年十二任重道悠利深
禍速身犯霧露於雲臺之上霧露謂疾病也不可指言死

常侍曹節矯詔遷太后於雲臺謝弔上封事曰伏惟皇大
后援立明聖幽居空宮如有霧露之疾陛下當何面目以

見天家嬰縲紲於罔犴之下縲索也縲繫也罔罔獄名
謂外戚等湮滅連踵傾軛繼路踵跡也軛車轅也賈而赴

蹈不息焦爛為期終陵夷大運淪亡神寶陵夷猶替也詩
書所歎畧同一揆故考列行跡以為皇后本紀

魏文帝受禪尊太后曰皇太后稱永壽宮明帝即位尊太后曰
太皇太后太和四年崩合葬高陵

黃初元年詔曰婦人與政亂之本也自今以後群臣不得奏事
太后后族之家不得當輔政之任又不得橫受茅土之爵以此
詔傳之後世若有違背天下共誅之

明帝立尊郭皇后為皇太后稱永安宮青龍三年帝數問甄后死狀於太后由是太后以憂崩

齊王即位尊郭皇后為皇太后稱永安宮其後值三主幼弱宰輔統政與奪大事皆先咨啓於太后而後施行母丘儉鍾會等作亂咸假其命以為辭焉景元四年崩葬高平陵西

景元元年十一月燕王表賀冬稱臣

帝即燕王宇之子宇稱臣故以為疑

詔曰占

之先王者或有不臣今王宜依此表不稱臣乎又當為報答夫係大宗者降其私親况所係者重邪若便同之臣妾朕所未安其皆依禮典據當務盡其義有司議奏以為禮莫崇於尊祖制莫重於王典陛下紹太宗之重崇三祖之業伏惟燕王禮尊屬戚正位蕃服躬秉虔肅以先萬國其於王典闡濟大順誠宜割以非常之制奉以不臣之禮臣等立議以為燕王章表可聽如舊式中詔所施宜曰皇帝敬問大王侍御議又云至於制書國

之舊典朝廷所以辯章於天下者也宜循法故曰制詔燕王議又曰凡詔命制書奏事上書文書有應稱燕王者皆云上字其非宗廟助祭之事不得稱王名奏事上事及史人皆不得觸王諱以彰殊禮加於群后云上尊王典尊祖之制俯順聖旨敬承之心 晉何琦議曰父母之尊擬則天地君親之道資敬是同今承受命運君臨率土而父以子尸天祿不敢子天子以明王者之道而子雖以為天子必有尊也推斯以言父必臣天位之君而子自必尊天性之父

晉惠帝即位尊楊皇后為皇太后后父駿受遺詔輔政元康元年賈后不肯以婦道事太后又欲干預政事而為太傅駿所抑乃啓帝作詔誣駿謀反誅之夷其族賈后矯詔使後軍將軍荀愔送太后于永安宮特全太后母高都君龐氏之命聽就太后居尋復諷群公有司奏曰皇太后陰潛教謀圖危社稷飛箭繫

書要募壯士同惡相濟自絕于天魯侯絕文姜春秋所許蓋奉祖宗任至公於天下陛下雖懷無已之情臣下不敢奉詔詔曰此大事更詳之有司又奏宜廢皇太后為曠陽庶人中書監張華議皇太后非得罪於先帝今黨其所親為不毋於聖世宜依漢廢趙太后為孝成后故事貶皇太后之號還稱武皇后居與宮以全始終之恩左僕射荀愷與太子少師下邳王晃等議曰皇太后謀危社稷不可復配先帝宜貶尊號廢詣金墉城於是有司奏請從是等議廢太后為庶人詔可又奏楊駿造亂家屬應誅詔原其妻龐命以慰太后心今太皇后廢為庶人宜以龐付廷尉行刑詔不許有司復請乃從之龐臨刑太后抱持號叫截髮稽顙上表詣賈后稱妾請全毋命不見省董養學遊太學升堂歎曰朝廷建斯堂將以何為乎每覽國家赦書謀反大逆皆赦至於殺祖父母父母不赦者以為王法所不容故也奈何公

卿處議文飾禮典乃至此乎天人之理既滅大亂將作矣二年太后以絕膳而崩年三十四在位十五年永嘉初追復尊號致堂胡氏曰按群公有司所奏張華所議徑以太后圖危社稷不毋於聖世方是時討楊駿者兩親王將殿中兵而出駿既無逆謀至是又未嘗有一戈指闕坐受攻討蹙迫而死太后以父之故射帛於外以祈免耳不知何名為圖危社稷不毋於聖世乎及有司再請廢后為庶人詔旨畫可華不復切諫依阿緘默陰附虐后而庸奴其君不待式乾之事已當誅殛不得赦矣

先公曰賈后弒故楊太后飢而死之也武帝身創大業且智力足以得天下而無以保妻子何也司馬氏三世以來強人之母以廢人之子奪人之國宜有斯報矣彼且以虛罪誣高貴鄉公而實受報於武悼后且皆是賈氏發之駕

虞罪於高貴鄉公者克也效實報於楊太后南風也天道昭昭亦巧於示報矣

東晉成帝即位尊庾皇后爲皇太后群臣奏天子幼冲宜依漢和熹皇后故事辟讓數四不得已臨朝稱萬機后兄中書令亮管詔命公卿奏事稱皇太后陛下及蘇峻作逆京師傾覆后見逼辱遂以憂崩年三十二在位六年

哀帝即位詔有司議生母章貴人位號乃尊爲皇太妃儀服與太后同又詔朝臣不爲太妃敬合典禮不太常江道議位號不極不應盡敬興寧元年薨帝欲服重服江彰啓應總麻三月詔欲降爲朞年霽又啓厭屈私情所以上嚴祖考帝從之

穆帝即位尊褚皇后爲皇太后以帝幼冲臨朝稱制太常殷融議從鄭玄議后父衛將軍裒在宮庭則盡臣敬太后歸寧之日自如家人之禮太后詔曰典禮誠所未詳如數奏是情所不能

安也更詳之征西將軍翼等議謂父尊盡於一家君敬重於天下鄭玄議合情理之中太后從之自是朝臣皆敬哀焉帝加元服乃居崇德宮哀帝海西公之世太后復臨朝稱制簡文帝即位尊后爲崇德太后帝崩孝武幼冲群臣復請臨朝孝武冠復稱崇德太后太元九年崩于顯陽殿年六十一在位四十年太后於帝爲從嫂朝議疑其服太學博士徐藻議曰資父事君而敬同又曰其夫屬父道者妻皆母道也則夫屬君道妻亦后道矣服后以齊母之義也魯譏逆祀以明尊卑今上躬奉康穆哀皇及靖后之祀致敬同於所天豈可敬之以君道而服廢於本親謂應齊衰暮從之

孝武皇帝即位尊生母李氏爲淑妃太元三年進爲貴人九年又進爲夫人十二年加爲皇太妃儀服一同太后十九年尊爲皇太后稱崇訓宮安帝即位尊爲太皇太后隆安四年崩葬脩

平陵神主祔于宣太后廟宣太后簡文帝母也

徐邈與范甯公書訪其事甯答謂子不得爵命母妃是太子婦號必也正名可以稱母也邈重與甯書曰禮天子之妃曰后閔雖稱后妃之德妃后之名可謂大同所以憲章皇極禮崇物備者在於此也故太后之號定於前朝而當今所率由也若必欲服章同於后而名號異於妃則可因夫人之稱而加皇太以明尊雖曰一理然於文物之章猶未盡崇高之極此又今之所疑不可得而行也足下嫌太子妻稱妃然古無此稱出於後代今有皇太之別可例論耶

宋武帝受禪尊後母蕭氏為皇太后帝事太后孝謹即位時春秋已高每旦朝太后未嘗失時刻少帝即位尊為太皇太后景平元年崩年八十一

宋武帝將崩手詔曰後世若有幼主朝事一委宰相母后不煩

臨朝孝武即位尊母淑媛為皇太后宮曰崇憲廢帝立為太皇

太后明帝立號崇憲太后乃居中宮崩

廢帝即位尊孝武王皇后為太后宮曰承訓其年崩

後廢帝即位尊明帝王皇后為皇太后宮曰弘訓順帝禪位遷

居丹陽宮拜汝陰王太妃順帝殂更立第都下薨于第

後廢帝母陳氏既即位尊為皇太妃輿服一如晉孝武李太妃

故事宮曰弘化置家令一人改詣國太妃曰太姬昇明初降為

蒼梧王太妃

陳文帝即位尊武帝章皇后為皇太后宮曰慈訓廢帝即位后

為太皇太后光大二年后下令黜廢帝為臨海王命宣帝嗣立

大建元年復為皇太后崩年六十五

後主即位尊宣帝柳皇后為皇太后宮曰弘範陳亡入長安隋

大業十二年薨于東都年八十三

後魏太武即位尊明元杜皇后爲皇太后封后弟爲遼東王真君元年崩詔天下大臨三日別立后寢廟於陵所

文成即位尊文成馮皇后爲太后帝年十二居諒闇丞相乙渾謀逆后密定策誅之遂臨朝聽政內行不正寵李弈等獻文誅弈遂害獻文孝文時尊曰太皇太后復臨聽政孝文雅性孝謹事無巨細一稟於太后后多智猜忌能行大事十四年崩年四十九孝文行三年喪魏獻文帝好黃老浮屠之學雅薄富貴常有遺世之心欲禪位於京兆王子推群臣固諫任城王雲曰陛下方隆太平臨覆四海豈得止違宗廟下奔兆民且父子相傳其來久矣陛下必欲委弃塵務則皇太子宜承正統中書令高允曰願陛下上思宗廟託付之重追念周公抱成王之事帝曰然則立太子群公輔之有何不可乃傳位於太子下詔曰朕希心玄古志存澹泊爰命儲宮踐升大位朕得優游恭已栖心浩

然群臣奏曰昔漢高祖稱皇帝尊其父曰太上皇明不統天下也今皇帝幼冲萬機大政猶宜陛下總之謹上尊號曰太上皇帝從之上皇徙居崇光殿采掾不斲土階而已國之大事咸以聞崇化宮在北苑中又建鹿野浮屠於苑中之西山與禪僧居之五年崩明帝即位尊宣武高皇后爲皇太后尋爲尼居瑤光寺非大節慶不入宮中時天文有變靈太后欲以后當之遂暴崩天下寃之喪還瑤光佛寺殯皆以尼禮

明帝尊母胡光華爲皇太妃後尊爲皇太后臨朝聽政猶曰殿下後改令稱詔群臣上書曰陛下自稱曰朕以明帝冲幼未堪親祭欲依周禮夫人與君交獻之義代行祭禮禮官博議以爲不可而太后欲以幃幔自障觀三公行事重問侍中崔光光便據漢和熹鄒后薦祭故事太后大悅遂攝行初祀臨朝淫恣五年爲元義所幽又六年誅義復臨朝自是朝政踈緩恩威不立

又三年鳩孝明立孝文曾孫劔爾朱榮興兵向闕沉后于河
齊文宣受禪尊母婁妃爲皇太后宮曰宣訓濟南即位尊爲太
皇太后密與孝昭及諸大將誅楊愔等廢濟南立孝昭後爲皇
太后孝昭崩又下詔立武成帝大寧二年崩年六十二
武成即位四年傳位於太子緯自稱太上皇又四年崩
後主即位武成既崩尊武成胡后爲皇太后后內行不謹幸和
士開及沙門曇獻等竊亡入周又恣行姦穢開皇中殂
周武成即位尊母叱奴氏爲皇太后建德二年崩

宣帝即位尊武帝后阿史那氏爲皇太后大象元年改爲天元
皇太后二年又尊爲天元上皇太后宣帝崩靜帝尊爲太后隋
開皇二年殂年三十二 又尊母李氏爲帝太后大象元年改
爲天元帝太后又尊爲太皇太后二年又尊爲天元聖皇太后
靜帝立尊爲大帝太后隋開皇初出俗爲尼八年殂以尼禮葬

宣帝既立一年傳位於太子闡自稱天元皇帝所居稱天臺殿
二十四旒車旗鼓皆倍於前王之數每對臣下自稱爲天用樽
彝瑋瓚以飲食令群臣朝天臺者齋三日清身一日自比上帝
立五皇后二年而崩

元崩靜帝時楊堅秉政尊天元楊后爲皇太后居弘聖宮堅
既受禪后憤惋愈甚堅內甚愧之開皇中封爲樂平公主大業
五年殂

靜帝母朱氏天元崩後尊爲帝太后隋初出俗爲尼

文獻通考卷之二百五十二

宋鄱陽

馬

端臨

貴興 著

明鄆陽

馮

天馭

應房 校刊

帝系考

太上皇太皇太后皇太后

唐高祖武德九年詔禪位于皇太子稱太上皇上皇以弘義宮有山林勝景雅好之貞觀三年四月乃徙居之改為太安宮上屢請上皇避暑九成宮上皇以隋文帝終於彼惡之乃營大明宮以為上皇清暑之所未成而上皇寢疾不果居九年崩高宗崩太子即位詔軍國大事聽天后處分元年天后廢帝遷之房陵立睿宗幽於別宮五年自稱聖母神皇殺唐宗室諸王又二年自稱大周聖神皇帝以睿宗為皇嗣賜姓武氏追謚祖考為帝立武氏七廟封武三思等為王又十四年張柬之等奉中宗誅張易之張昌宗帝復位其年后崩

韋后鳩弒中宗立廢帝爲皇太后臨朝總廢政臨淄王隆基舉兵誅之追廢爲庶人

睿宗在位二年制傳位于太子太子上表固辭太平公主勸上雖傳位猶宜總大政上乃謂太子曰汝以爲天下事重欲朕兼理之耶昔舜禪禹猶親巡狩朕雖傳位豈忘國家其軍國大事當兼省之八月庚子玄宗即位尊睿宗爲太上皇太上皇自稱曰朕命曰誥五日一受朝於太極殿皇帝自稱曰予命曰制勅日受朝於武德殿三品以上除授及大刑政決於上皇餘皆決於皇帝明年七月上誅太平公主及其黨上皇誥自今軍國政刑一皆取皇帝處分朕方無爲養志以遂素心是月徙居百福殿開元四年上皇崩

致堂胡氏曰睿宗每自謂素懷淡泊不樂世務然則盍不於傳位之時盡釋萬機則太平亦無所恃而謀亂乃有眷

眷之情尚知大政昧於亢龍有悔之義是以不智處身而以不孝處其子也豈非後王之戒哉

又曰玄宗舉兵誅討韋氏雪君憤辱厥功雖大而意在自取不得已而歸之於父尋又怵惑邪說殺父同氣至使睿宗盡釋大權而問安侍膳以天下養之事一無聞焉其友愛隆厚獨施之五王同寢共宴遊戲賞樂更奏絲竹親煮藥餌何其至也豈非以手足天性均出於父乎施諸手足者如此於父宜如何而孝養無聞五月而葬不太薄乎古之人所以大過人者無他善推其所爲而已玄宗能其小而不能其大力於次者而忽於至者不推其所爲無乃初心有利欲之蔽乎無乃惑宋王之讓已而薄其父乎雖享國日久而天理好還終不可追是故正其義不謀其利者爲子則孝爲臣則忠自天子至於庶人其揆一也

肅宗至德元年即位於靈武尊玄宗曰上皇天帝靈武使者至蜀上皇喜曰吾兒應天順人吾復何憂制自今改制勅爲誥表疏稱太上皇四海軍國事皆先取皇帝進止仍奏朕知俟克復上京朕不復預事命韋見素房琯崔渙奉傳國寶王冊詣靈武傳位二年克復兩京使韋見素入蜀奉迎上皇上皇至鳳翔從兵六伯餘人上皇命悉以甲兵輸郡庫上發精騎三千奉迎十二月丙午上皇至咸陽上備法駕迎於望賢宮上皇在宮南樓上釋黃袍著紫袍望樓下馬趨進拜舞於樓下上皇降樓撫上而泣上捧上皇足嗚咽不自勝上皇索黃袍自爲上著之上伏地頓首固辭上皇曰天數人心皆歸於汝使朕得保養餘齒汝之孝也上不得已受之父老在伏外歡呼且拜上令開仗縱千餘人入謁上皇曰臣等今日復覩二聖相見死無恨矣上皇不肯居正殿曰此天子之位也上固請自扶上皇登殿尚食進食上品嘗而薦之丁未將發行宮上親爲上皇習馬而進之上皇上馬上親執鞚行數步上皇止之上乘馬前引不敢當馳道上皇謂左右曰吾爲天子五十年未爲貴今爲天子父乃貴耳左右皆呼萬歲上皇自開遠門入大明宮御舍元殿慰撫百官乃詣長樂殿九廟主慟哭久之即日幸興慶宮遂居之上累表請避位還東宮上皇不許時李輔國暴貴用事上皇左右皆輕之輔國意恨言於上曰上皇居興慶宮與外交通陳玄禮高力士謀不利於陛下當爲社稷計豈得徇匹夫之孝若迎居大內以杜絕小人上不應上元元年上寢疾輔國矯詔將五百騎露刃迎上皇遷居甘露殿上皇驚幾墜所留侍衛纔庭老數十人流力士等於遠方輔國等詣上請罪上曰卿防微杜漸以安社稷何懼也自是上皇日以不憚辟穀成疾上初猶往問安旣而但遣人起居寶應元年上皇崩

致堂胡氏曰靈武即位之事玄宗既有傳位之命則太子非叛也范氏唐鑑謂肅宗以皇太子討賊遂自稱帝此乃太子叛父何以討祿山也其失在玄

宗命不承行而裴冕諸人急於榮貴是以致此咎也唐高祖睿玄之為上皇非所欲也勢可以釋位而不釋遂至逼

迫不見幾故也而太宗明肅不能少待或稱兵或借便皆

有不尊位之惡欲遠見小利故也父不父子不子昧於春秋

首惡誅之戒甚矣豈非後世之大鑒歟

又曰內寵嬖豎合而為一人主不悟又委信之其終不至

於篡弒逆亂者古無有也肅宗之事亦可以為鑒矣夫祖

考所為賢且德也子孫晞之鮮能及者非賢非德也子孫

效之鮮不過焉兩漢而下繼世之君往往柩前即位孰有

為天子子親承大寶得問安侍膳舉四海之養以全其孝

盡其樂如唐數君可謂千載一時不可逢之嘉會矣而太

宗明皇肅宗之孝道無稱焉豈非自太宗失之歟高祖睿

玄晚節末路不免兵甲震驚之禍而玄宗尤酷嗚呼悲夫
輔國之言曰陛下當為社稷大計豈得徇匹夫之孝夫孝
以奉父母為先然後上及於祖宗今父在也乃困其身体
其心而社稷是安此中人以下所能辨者肅宗不察蓋自
馬嵬西行輔國已有是言今又云尔是知肅宗為人可誘
以利故也當是白刃脅遷盡去左右之人而居西內上皇
辟穀成疾以致殂殞其異於趙武靈王沙丘之禍幾希矣
夫以討賊之故奪父之位其終歸於如此使安慶緒史朝
義而有知豈不含笑於九泉元結頌唐中興曰盛德曰大
業是過譽其始而未知其終也

順宗永貞元年德宗崩即位疾不能親事傳位太子純稱太皇
皇憲宗元和元年太上皇崩

憲宗立尊順宗王皇后為皇太后十年崩年五十四

穆宗立尊憲宗郭后為皇太后敬宗立尊為太皇太后宣宗立

母鄭故侍兒有暴怨帝奉養后禮稍薄后鬱鬱不聊太中二年

暴崩

宣宗立尊母鄭妃為皇太后懿宗尊為太皇太后咸通二年崩

敬宗立尊穆宗王后為皇太后文宗時稱寶曆太后太和五年

宰相建白以太皇太后與寶曆太后稱號未辨前代詔令不敢

斥言皆以宮為稱今寶曆太后居義安殿宜曰義安太后詔可

會昌五年崩

文宗立尊母蕭氏為皇太后后太和中懿安太后居興慶宮憲宗

宗和寶曆太后居義安殿穆宗崩后居內殿穆宗崩號三宮太

后帝每五日問安及歲時慶謁率由複道至南內群臣及命婦

諸宮門候起居有司獻四時新物迭三宮亦稱賜帝曰上三宮

賜為奉何可言賜遞索筆改

按唐自肅宗張后之後未嘗有正位長秋者史所載皇

后皆追贈其太后則皆所生子為帝而奉上尊號者也

憲宗以郭汾陽孫女為妃既為令族又有淑德可以正

位矣乃以其宗強恐既立之後後宮不得進遂終身為

妃自後人主皆不立后然文宗崩既有太子仇上良等

廢之而立武宗武宗崩既有皇子諸宦官廢之而立宣

宗宣宗崩遺命立夔王王宗實等廢之而立懿宗雖當

時中人專橫今古所無然亦因掖房虛位宮闈無主所

謂皇子者皆無龍無威之人故上躬彌留之際宰輔既

隔在外庭中人遂得以肆行無忌顯違詔旨私立所厚

而莫由禁止也昭宗為朱全忠所弒哀帝即位尊何后為皇太后徙居積善宮

號積善太后帝既禪位后亦遇害

後唐莊宗既即位冊尊母曹氏爲皇太后而以嫡母劉氏爲皇太妃往謝太后太后有慚色太妃曰願吾兒享國無窮使吾獲沒於地以從先君幸矣復何言哉帝既滅梁使人迎太后歸洛居長壽宮而太妃獨留晉陽同光三年五月太妃薨七月太后薨謚曰貞簡葬坤陵而太妃無謚葬魏縣太妃與太后甚相愛其送太后于洛也涕泣而別太妃既卒太后悲哀不飲食月餘亦崩

愍帝即位冊尊明宗后曹氏爲皇太后淑妃王氏爲皇太妃而敬瑭兵犯京師廢帝與太后俱自燔死晉高祖立遷太妃于至德宮高祖后事妃如母乃封其所養子許王從益爲郟國公以奉唐祀契丹犯京師召從益與妃德光北歸留蕭翰守汴州漢高祖起太原翰欲北去乃使人召從益迫以衆令權知南朝事

漢高祖擁兵而南妃及從益遣人迎之既而俱遇害

晉出帝即位尊高祖后李氏爲皇太后契丹入汴北遷歿于虜地建州安太妃出帝母即位冊爲太妃北遷歿于虜地

漢愍帝即位尊高祖后李氏爲皇太后周太祖入京師舉事皆稱太后誥已而議立湘陰公贇爲天子未至請太后臨朝已入太祖出征軍士擁之以還太祖請事太后如母於是遷后於太平宮上尊號曰昭聖皇太后顯德元年春崩

周太祖皇后柴氏無子養后兄守禮之子以爲子是爲世宗守禮字克讓以后族拜銀青光祿大夫檢校吏部尚書兼御史大夫世宗即位加金紫光祿大夫檢校司空光祿卿致仕居于洛陽終世宗之世未嘗至京師而左右亦莫敢言第以元舅禮之守禮頗恣橫嘗殺人于市有司以聞世宗不問時王溥王晏王彥超韓令仲等同時將相皆有父在洛陽與守禮朝夕往來惟意

所爲洛陽人多畏避之號十阿父守禮卒年七十二官至太傅
歐陽公史論曰父子之恩至矣孟子言舜爲天子瞽瞍殺
舜人則弃天下竊負之而逃以謂天下可無舜不可無至公
舜可弃天下不可刑其父此爲世立言之說也然事固有
不得如其意者多矣蓋天子有宗廟社稷之重百官之衛
朝廷之嚴其不幸有不得竊而逃則如之何而可予讀周
史見守禮殺人世宗寢而不問蓋天下重矣而子於其父
亦至矣故寧受屈法之過以申父子之道其所以合於義
者蓋知權也君子之於事擇其輕重而處之耳失刑輕不
孝重也刑者所以禁人爲非孝者所以教人爲善其意一
也孰爲重刑一人未必能使下無殺人而殺其父滅天性
而絕人道孰爲重權其所謂輕重者則天下雖不能弃而
父亦不可刑也然則爲舜與世宗者宜如何無使瞽瞍守

禮至於殺人則可謂孝矣

周恭帝即位尊世宗皇后符氏爲皇太后宋太祖既受禪遷居
西宮號周太后太平興國初入道爲尼淳化四年殂

宋昭憲皇太后杜氏定州安喜人太祖之母帝受禪尊爲皇太
后建隆二年六月崩

真宗即位尊太宗明德李后爲皇太后居西宮嘉慶殿景德元
年崩

仁宗即位尊真宗莊獻明肅皇后爲皇太后軍國大事權取處
分宰相丁謂等請太后所御殿太后曰皇帝視事當朝夕在側
何須別御一殿於是謂太后與帝五日一御承明殿帝位在太
后位右垂簾決事議已定太后忽出手書第欲禁中閱章疏遇
大事即召對輔臣其謀出於丁謂非太后意也謂既貶馮拯等
三上奏請如初議始御承明殿有司請制令稱吾以生日爲長

寧節出入御大安輦鳴鞭侍衛如乘輿天下皆避太后父諱群臣上尊號曰應元崇德仁壽慈聖太后元日帝率百官上壽謁太廟乘玉輅服衮衣明道二年崩

天聖二年七月宰臣王欽若等拜表請上皇太后尊號曰應元崇德仁壽慈聖皇太后命宰臣王曾撰冊文叅知政事魯宗道書冊寶十一月郊祀禮畢帝御大安殿受冊百僚稱賀畢甫序班侍中奏外辨禮儀使奏請發皇太后尊號冊寶皇帝服承天冠絳紗袍以出殿中監進珪禮儀使與閣門使前導皇帝隨冊寶降西階內臣主當職掌捧正殿庭置於東向褥位禮儀使奏請皇帝再拜在位官皆再拜應行事公卿再拜訖太尉司徒就受冊寶位皇帝指主跪捧冊授太尉太尉指笏東向側身跪受其冊文曰嗣皇帝臣作宗謹再拜稽首言恭以為天下之母者愛育之功博居域中之大者覆載之道均乃有飾盛禮以推崇因

強名而不顯以恩則尊親借極以義則中外一辭表德垂鴻非

可以缺况乎寧保基緒撫覽權綱格萬宇之治平副輿情之輸

戴式隆稱號以播休鑠伏惟皇太后陛下聰明淑哲淵穆懿恭

襲御龍之遐源啓曾沙之瑞命輔佐先聖輯睦藩房申翊宮朝

協敷闡教服圖史之至戒慕黃老之微言及正宮承天居尊治

內勤儉之化式於中闡和平之風被于四表王基允固睿問載

融曩者號弓在辰仍几有命粵以大寶付于菲躬榮榮哀荒懼

罔攸濟寔賴慈蔭以授洪圖上奉顧託之明俯慰遐邇之望詳

錄機務咨謀政經憲祖宗之舊章厲官師之凝績本乎子物之

惠濟乃守成之業方今蠻夷款服封宇靖安百度聿脩六氣時

若肇禋肆類克展上儀享是休嘉率由保翼故得公卿庶尹藩

嶽守臣武旅戎酋緇黃老艾咸謂周有思齊之什播于聲歌漢

有長樂之謚垂于竹帛斟酌前訓擬議盛猷允非鴻名莫揚茂

烈綿代曠典自我而著舊且推美而弗有約已以至謙連袂叩
闔露草五請臣等以因人之欲拜跪於內甫迴冲慮乃徇公言
夫含章履順之謂應元詔詞逮下之謂崇德體仁所以膺壽臧
之福宣慈所以隆聖善之懿不勝大願謹與百僚士庶奉玉冊
琮寶上尊號曰應元崇德仁壽慈聖皇太后伏惟懋協歡心誕
膺洪冊承七廟之流祥受九旻之敷錫擁佑家邦祉祚無極臣
仁宗誠懽誠忭稽首頓首謹言又捧寶授司徒如授冊儀皇帝
歸御幄改常服乘輿赴文德殿後幄百官班退並赴朝堂幕次
太尉司徒奉冊寶至文德殿門外陞奉安文武群官宗室客使
並集於文德殿中書門下翰林學士兩省御史臺並立於殿階
下香案前侍中奏中嚴外辨皇太后服儀天冠衮衣以出奏隆
安之樂行障步障方團扇侍衛垂簾即御座南向樂止太常卿
前導冊案前至殿西階下太常卿以下各歸位典儀曰再拜在

位者皆再拜分班東西序立吏部侍郎押冊案禮部侍郎押冊
弁進至褥位當御座前訖太尉跪奉冊案稍前中書令讀冊訖
奉冊亟北向進至於御座前訖中書令舉冊官俱降選位太尉
降階納舄帶劔訖侍中押寶案司徒捧寶侍中讀寶並如讀冊
之儀畢置於御座前冊之南訖司徒太尉詣香案前分班東西
序立尚宮詣皇帝御座前奏請皇帝詣皇太后御座前行稱賀
之禮皇帝服鞞袍簾內詣皇太后御座前奏請再拜訖跪賀曰
嗣皇帝臣仁宗言皇太后陛下顯崇徽號昭渙寰瀛伏惟與天
同壽率土不勝欣忭俛伏興又再拜尚宮詣御座承旨荅曰皇
帝孝思至誠貫于天地受茲徽號感慰良深宣荅訖皇帝再拜
歸御座幄太尉率文武百僚詣皇太后御座前稱賀侍中承旨
宣荅訖在位官俱再拜禮畢奏隆安之樂皇太后降座還幄次
樂止侍中奏解嚴所司放仗文武百僚並再拜訖退皇帝皇太

后還內應外命婦稱賀皇帝皇太后於內殿在外命婦及兩京留司官並奉表稱賀

石林葉氏曰母后加謚自東漢始本朝后謚初止二字明道中以章獻明肅嘗臨朝特加四字元豐中慶壽太皇太后上仙章子厚為謚議請于朝詔以太皇太后功德盛大四字猶懼未盡始仍故事遂謚慈聖光獻自是宣仁聖烈與欽聖憲肅皆四字云

章獻太后崩遺詔以皇太妃楊氏為皇太后居宮中參斷軍國事御史中丞蔡齊白執政以為不可乃詔勿頒預政遺詔第存后號即所居殿號曰保慶太后景祐三年崩

英宗即位尊仁宗慈聖光獻皇后為皇太后帝感疾請權同處分軍國事御內東門小殿聽政帝康復乃徹簾勅有司崇峻典禮下令稱聖旨神宗立尊為太皇太后名宮曰慶壽元豐二年

崩

神宗立尊英宗宣仁聖烈皇后為皇太后居寶慈宮哲宗嗣位尊為太皇太后同御延和殿詔書稱吾以生日為坤成節令天下避后父諱元祐八年崩

元豐八年三月哲宗即位太皇太后權同聽政三省樞密院按儀注未釋服已前遇隻日皇帝御迎陽門日參官並赴起居依例奏事每五日遇隻日於迎陽門垂簾皇帝坐於簾內之北宰臣執政官升殿奏事權屏去左右侍衛事有幾速許非時請對及賜宣召亦許升殿禮部御史臺閣門奏討論御殿及垂簾儀制每朔望大參皇帝御前殿百官起居三省樞密院奏事應見謝辭班退各令詣內東門進榜子皇帝雙日御延和殿垂簾日參官起居太皇太后移班少西起居皇帝並再拜三省樞密院奏事三日已上四拜不舞蹈候祔廟畢起居如常儀簾前通事

以內侍殿下以閣門吏部磨勘奏舉入垂簾日引應見辭謝臣僚遇朔望參日不坐並先詣殿門次內東門應擡賜者並門賜從之是月帝御迎陽門幄殿同天皇太后垂簾宰臣親王以下合班起居常例分班十六至是合班以閣門奏請故也四月三省樞密院言續討論垂簾故事儀注應合告謝臣僚並垂簾日引依閣門見行儀制從之八月御史中丞黃履言朔望皇帝御前殿合赴起居官次日赴延和殿垂簾起居從之元祐元年閏二月右諫議大夫孫覺右諫議蘇轍進對有旨俟簾下內臣盡出方得敷奏

哲宗立尊神宗欽聖憲肅皇后爲皇太后哲宗崩決策迎立徽宗帝請權同處分軍國事辭帝固請乃從令外間不避家諱不立誕節名不通使遼國輔臣不於小殿奏事纔六月即還政明年崩

元符三年正月徽宗即位皇太后權同聽政三省樞密院聚議故事嘉祐末英宗請慈聖同聽政五月同御內東門小殿垂簾至七月十三日英宗間日御前後殿輔臣奏事退詣內東門簾前覆奏明年手書還政又故事唯慈聖不立生辰節名不遣使契丹若天聖元豐則御殿垂簾立誕節名遣使與北虜往還及避家諱等曾布曰今上長君豈可垂簾聽政請如嘉祐故事施行蔡卞曰天聖元豐與今日皆遺制處分與嘉祐末英宗請聽政不同布曰今日之事雖載於遺制實出自德音又皆長君正與嘉祐事相似既奏得旨並依嘉祐治平故事施行布又謂同列曰奏事先奏太后次覆奏皇帝如今日所得指揮遂爲定式皇太后手詔付中書省曰皇帝踐祚之初勉從勤請非久便當退歸房闈除不御前後殿已指揮外如避家諱等並勿行哲宗立尊生母朱德妃爲皇太妃時宣仁欽聖二太后皆居尊

故稱號未得極其至元祐三年宣仁詔母以子貴輿蓋仗衛冠服悉伴皇后紹聖中欽聖復即閣建殿改乘車為輿上設行龍出入由宣德門百官上殿稱殿下名所居為聖瑞宮崇寧初崩追尊為皇后

靖康二年二帝北狩金人僭立張邦昌邦昌迎哲宗元祐皇后入禁中垂簾聽政后遣使迎康王降手書播告天下王即位于南京后撤簾上尊后為元祐太后奉迎至行在所以元字犯后祖諱改稱隆祐太后從上幸維揚幸杭州苗傅劉正彥作亂請后聽政上復辟撤簾建炎三年避狄如虔州紹興元年崩

徽宗既立尊哲宗元符皇后為皇太后殿為崇恩宮政和三年暴崩

徽宗宣和七年十二月上內禪以道君號退居龍德宮皇太子即皇帝位尊道君為太上皇帝靖康元年上皇如南京避狄到

鎮江三月虜退命李綱迎上皇于南京十一月京城失守二年二月上皇北狩紹興五年崩于五國城

欽宗既受禪尊徽宗顯肅皇后為太上皇后遷居寧德宮稱寧德太后京城失守從上皇北遷留虜中五年崩

高宗既即位遥尊母章賢妃為宣和皇后紹興十年遥上皇太后冊寶於慈寧殿自後每遇誕日至朔皆遥行賀禮十二年八月自虜中歸至臨安入居慈寧宮二十九年崩

紹興三十二年六月上內禪稱太上皇退處德壽宮八月加上尊號為光堯壽聖太上皇帝乾道七年再加上尊號為光堯壽聖憲天體道太上皇帝淳熙二年再加上尊號為光堯壽聖憲天體道性仁誠德經武緯文太上皇帝是年以聖壽七十行慶壽禮十二年再加紹業興統明謨盛烈八字十三年以聖壽八十行慶壽禮赦天下十四年冬十月崩

三十二年六月十一日內禪十二日上詣德壽宮欲以是日率百官朝太上皇於德壽殿以兩百僚免入見上就宮中行禮自後上詣宮行禮即不集百官陪十三日詔令宰臣率百官於初五日十六日詣德壽宮起居又詔朕欲每日一朝德壽宮面奉慈音恐廢萬機煩群下不許如前代朔望之禮太簡令禮官重定其期禮部請依漢高帝五日一朝太公故事每五日一詣德壽宮朝見如宮中禮從之仍詔自今後詣德壽宮惟經過官司起居餘並免十七日太上宣諭車駕每至宮必於門外降輦既行家人之禮自宜至殿上降輦又不須五日一朝只朝朔望於是存司請除朔望朝外於每月初八日二十二日詣德壽宮起居如宮中儀從之自後皆遵此制如值雨及盛暑初寒臨期承太上特旨仍免詣十二月冬至上詣德壽宮稱賀上壽禮畢入見太后如宮中之儀自後正至並同乾道元年二月朔上詣德壽宮請

太上太后至延祥觀燒香次幸聚景園次幸玉津園太上聖旨

日晚免車駕從還德壽宮臣僚止從駕還內沿路並免起居除

軍官從駕外執政官以下並免以後或恭請幸南內或幸聚景園玉津園延祥

觀靈隱天竺寺其儀並同

皇帝朝德壽宮儀注

前期儀鸞司設大次於德壽宮門內小次於殿東節西向其日俟皇帝出即御座從駕臣僚禁衛等起居如常儀皇帝降御座乘輦將至德壽宮報文武百僚詣宮門外迎駕起居訖前導官太常卿閣門官太常博士禮直官先入詣大次前分左右立定俟皇帝詣德壽宮大次降輦入次御史臺閣門大常寺報文武百僚入詣殿庭北向立定前導官導皇帝入小次簾降俟太上皇帝即御座小次簾捲前導官導皇帝升殿東階詣殿上拆檻前奏請拜皇帝再拜訖前導官導皇帝稍前躬奏聖躬萬福訖

導皇帝復位又奏請拜皇帝再拜訖導皇帝詣太上皇帝御座
之東西向立前導官於殿上隨地之宜少立揖班首以下躬典
儀曰拜贊者承傳曰拜在位官皆再拜訖直身搯笏躬身三舞
踏跪左膝三叩頭出笏就一拜又兩拜拜訖且躬身班首不離
位奏聖躬萬福訖典儀曰拜贊者承傳曰拜在位官皆再拜又
兩拜拜訖直身立捲班出前導官以次退從駕官歸幕次太上
皇帝駕興皇帝從入見太上帝后如宮中之儀訖以俟皇帝還
內如來儀每遇正旦冬至及

淳熙三年十一月詔太上皇帝聖壽無疆新歲七十用十一月
冬至加上尊號冊寶十二月十七日立春行慶壽禮是日早文
武百僚並簪花赴文德殿立班聽宣慶壽赦

赦文太極之功不宰其可贊者兩儀之生大明之照無疆所
能推者千載之至欽惟聖父誕保我家二百餘載而中天定

神器於歌側艱虞之始三十六年而宅位授朕師於康強服
豫之時上穹綿有永之年下土洽無爲之化興言非質日侍
慈顏竭幅員之富而未足伸至養之誠極尊美之稱而未足
表難名之德茲載新於歲律庸展慶於耆齡前殿奉卮企高
皇而踵武大安進膳邁貞觀之彌文鏘金奏以克庭儼臣工
而在列和氣邁周於宇宙盛容創見於古今仍內奉於母儀
庸備殫於子道爲酒以介眉壽誕膺純嘏之常立春而下寬
書更廣庶民之富可大赦天下於戲建無窮之基則享無窮
之樂命方卜於萬年有非常之事則侈非常之休恩盍推於
四海矧群黎百姓夙依於覆育而耆老大夫咸自於甄陶今
而仁壽之同躋必也安榮之共保諒爾有邦之衆知予錫類
之心赦書日行五百里敢以赦前事言者以其罪罪之主者
施行

宣赦訖從駕官並赴後殿起居謝花再拜從駕至德壽宮行慶壽禮

陳設

前期儀鸞司陳設德壽宮殿上當中南向設大次於德壽宮內南向小次於殿東廊西向設皇帝褥位二一於御座之東西向一於御座之南北向尚醞設御酒器於御座之東有司又設御茶床於御座之西俱稍北

上壽

其日後殿入內官喝排立俟催班立定應從駕應奉官禁衛等赴德壽宮並簪花以俟迎駕起居閣門報班齊皇帝服鞞袍出宮門禁衛諸班親從等並迎駕自贊常起居自贊謝花兩拜入內省執骨及使拜皇帝坐知閣門以下御帶環衛官諸司祇應官等一班闕班宣名常起居次贊謝花兩拜訖知閣門官升殿讀奏目餘官並退

次舍人引應從駕官一班赴當殿宣名常起居次贊謝花兩拜執政有奏事如儀皇太子內中起居簪花以俟從駕次管軍一班宣名常起居次贊謝花兩拜訖皇帝升輦將至德壽宮文武百僚迎駕常起居贊謝花兩拜訖前導太常卿閣門官太常博士禮直官并管軍御帶環衛官詣大次前分左右立文武百僚入詣德壽殿下東西相向立俟皇帝至大次降輦入次簾降簪花服鞞袍閣門御史臺太常寺分引皇太子以下應從駕官入詣德壽殿下東西相向立大次簾捲前導官前導皇帝入小次簾降前導太常卿閣門官管軍御帶環衛官等俟太上皇帝出宮行門禁衛諸班親從等迎太上皇帝自贊常起居太上皇帝升御座鳴鞭小次簾捲前導官前導皇帝升殿東階詣殿上折檻前北向褥位奏請拜皇帝再拜訖躬奏聖躬萬福訖又奏請拜皇帝再拜訖前導皇帝詣太上皇帝御座之東趨道西向立前導官於殿上隨

地之宜立閣門御史臺太常寺分引皇太子并文武百僚並橫
行北向立舍人揖皇太子以下躬與儀曰拜贊者承傳在位官
皆再拜搢笏舞蹈又再拜訖且躬身班首不離位奏聖躬萬福
訖典儀曰拜贊者承傳在位官皆再拜訖直身立分東西相向立
禮直官引奉盤盞參知政事受盤盞參知政事承旨宣答簽書
樞密院事奏禮畢戶部尚書殿中監少監升殿東階奉盤盞參
盤盞參知政事殿中監少監請酒稍北南向立承旨宣答
簽書樞密院事并奏禮畢戶部尚書請折盤之東西向立舍人
通樂人姓名已下四拜起居次看盞人稍前贊拜兩拜贊上殿
祇候內侍進御茶床殿侍酌酒託尚醞典御以盤盞酒注授殿
中監少監次禮直官引奉盤盞參知政事請酒樽所北向搢笏
殿中監奉盤盞參知政事捧盤盞西向立殿中監啓盞殿中少
監以酒注于盞奉盤盞參知政事奉酒請皇帝前北向禮直官
盤盞參知政事請太上皇帝閣門御史臺太常寺分引皇太子并文
武百僚橫行北向立俟奉盤盞參知政事躬進皇帝皇帝奉酒請太
上皇帝御座前躬進訖少後受盤盞參知政事躬接訖復授奉
盤盞參知政事前導官導皇帝詣御座前禡位北向俛伏跪殿
下皇太子并百僚並躬身皇帝致詞曰皇帝臣御稽首言天祐
君親錫茲難老維春之吉年德加新臣御與群臣等不勝大慶
謹上千萬歲壽伏興奏請拜皇帝再拜典儀曰拜贊者承傳在
位官皆再拜訖直身立分東西相向立前導官導皇帝詣御座
東西相向立奉盤盞參知政事以盤北向躬進皇帝訖奉盤盞
參知政事復皇帝捧盤請御座東西向立樂作俟太上皇帝飲酒訖皇
帝躬接盞樂止少後受盤盞參知政事躬接訖以授尚醞典御
各復位立閣門御史臺太常寺分引皇太子并文武百僚橫行
北向立前導官導皇帝詣禡位北向奏請拜皇帝再拜典儀曰
拜贊者承傳在位官皆再拜訖直身立前導官導皇帝詣御座

地之宜立閣門御史臺太常寺分引皇太子并文武百僚並橫
行北向立舍人揖皇太子以下躬與儀曰拜贊者承傳在位官
皆再拜搢笏舞蹈又再拜訖且躬身班首不離位奏聖躬萬福
訖典儀曰拜贊者承傳在位官皆再拜訖直身立分東西相向立
禮直官引奉盤盞參知政事受盤盞參知政事承旨宣答簽書
樞密院事奏禮畢戶部尚書殿中監少監升殿東階奉盤盞參
盤盞參知政事殿中監少監請酒稍北南向立承旨宣答
簽書樞密院事并奏禮畢戶部尚書請折盤之東西向立舍人
通樂人姓名已下四拜起居次看盞人稍前贊拜兩拜贊上殿
祇候內侍進御茶床殿侍酌酒託尚醞典御以盤盞酒注授殿
中監少監次禮直官引奉盤盞參知政事請酒樽所北向搢笏
殿中監奉盤盞參知政事捧盤盞西向立殿中監啓盞殿中少
監以酒注于盞奉盤盞參知政事奉酒請皇帝前北向禮直官
盤盞參知政事請太上皇帝閣門御史臺太常寺分引皇太子并文
武百僚橫行北向立俟奉盤盞參知政事躬進皇帝皇帝奉酒請太
上皇帝御座前躬進訖少後受盤盞參知政事躬接訖復授奉
盤盞參知政事前導官導皇帝詣御座前禡位北向俛伏跪殿
下皇太子并百僚並躬身皇帝致詞曰皇帝臣御稽首言天祐
君親錫茲難老維春之吉年德加新臣御與群臣等不勝大慶
謹上千萬歲壽伏興奏請拜皇帝再拜典儀曰拜贊者承傳在
位官皆再拜訖直身立分東西相向立前導官導皇帝詣御座
東西相向立奉盤盞參知政事以盤北向躬進皇帝訖奉盤盞
參知政事復皇帝捧盤請御座東西向立樂作俟太上皇帝飲酒訖皇
帝躬接盞樂止少後受盤盞參知政事躬接訖以授尚醞典御
各復位立閣門御史臺太常寺分引皇太子并文武百僚橫行
北向立前導官導皇帝詣禡位北向奏請拜皇帝再拜典儀曰
拜贊者承傳在位官皆再拜訖直身立前導官導皇帝詣御座

之東褥位西向立舍人揖皇太子已下躬典儀曰拜贊者承傳
在位官皆再拜搢笏舞蹈又再拜訖直身立內侍舉御茶床禮
直官引戶部尚書詣御座前北向俛伏跪奏具官臣某言禮畢
伏興退復位立典儀曰拜贊者承傳在位官皆再拜訖直身立
分相向立次舍人贊樂人謝祇應兩拜訖太上皇帝駕興皇帝
從入宮文武百僚前導應奉官等以次退皇帝皇太子入賀太
上皇后於宮中行禮執政率文武百僚拜牋賀太上皇后訖以
俟駕興從駕并應奉官禁衛等並簪花從駕還內

建炎以來朝野雜記昭慈聖獻皇后之在建康也有司月
奉千緡而止后生辰別奉緡錢萬時朝廷用度不給故其
禮不及承平時其後顯仁后自北來歸歲奉錢二十萬緡
月奉萬緡冬年帛二萬餘匹
生辰給萬匹春冬端午
寒食生辰倍之帛三千匹綾羅二千匹
五千兩酒日一斗羊三羖高宗在德壽宮孝宗命有司月

供十萬緡高宗以養兵多費詔減其六萬及孝宗在重華
命月進三萬緡而已上受禪詔太皇太后月奉緡錢二萬
皇太后萬五千上皇太后五萬而重華別給二萬焉

右光堯之壽社壽皇之孝養古今罕儷故具載其事于
此

孝宗既受禪尊憲聖皇后爲皇太后居德壽宮上尊號曰壽聖
太上皇后每遇誕節上詣宮上壽至朔望朝上皇畢入見后如
宮中之儀乾道七年加壽聖慈明尊號淳熙二年以上皇慶壽
禮又加號壽聖齊明廣慈十年后年七十行慶壽禮十三年加
尊號備德二字上皇崩遺詔改稱皇太后上欲迎還大內太后
以上皇几筵在德壽宮不許因築本殿名慈福光宗即位后當
爲太皇太后以壽皇故更號曰壽聖皇太后紹熙四年慶壽八
十加號隆慈備福孝宗崩始稱太皇太后光宗疾不能行喪禮

宰臣請后於壽皇梓宮前垂簾宣光宗手批立寧宗慶元元年
加尊號光祐二字二年遷居重華宮易名曰慈福三年崩

容齋洪氏隨筆曰唐德宗即位訪求其母沈太后歷順宗
及憲宗時曾祖母故稱為曾太皇太后蓋別於祖母也舊
新二唐書紀皆載之今慈福太皇太后在壽康太上時已
加尊稱若於主上則為曾祖母當用唐故事加曾字向者
嘗已告宰相而省吏以為典故所無天子逮事三世安得
有前比亦可謂不知禮矣又嗣濮王士歆在隆興為從叔
祖在紹熙為曾叔祖慶元為高叔祖矣而仍稱皇叔祖如
故士歆視嗣秀王伯圭為從祖今圭稱皇伯祖而歆但為
皇叔祖乃是弟爾禮寺亦以為國朝以來無稱曾高者彼
蓋不知累朝尊屬元未之有也

淳熙十六年二月內上禪皇太子即位移御重華宮上尊號曰

至尊壽皇聖帝至紹熙五年崩

光宗既受禪上成肅皇后尊號曰壽成皇后孝宗崩上皇太后
尊號慶元初加號惠慈嘉泰二年上太皇太后尊號

紹興五年六月壽皇崩光宗以疾不能行喪禮七月憲聖太皇
太后命皇子嘉王即皇帝位尊光宗為太上皇居泰安宮

以內中寢殿為慶元元年上尊號曰聖安仁壽六年崩

寧宗既即位尊慈懿皇后為皇太后退居壽康宮慈寧殿上尊
號曰壽仁慶元六年崩

文獻通考卷之二百五十二

帝系

文獻通考卷之二百五十二

七

號

文獻通考卷之二百五十三

宋鄱陽馬端臨貴與著

明斬陽馮天馭應房校刊

帝系考 后妃 皇太子妃及後宮 策后妃及策大

黃帝娶於西陵之女西陵國名也是為嫫祖祖一作嫫祖力追反索

一反正義曰嫫祖為黃帝正妃索隱曰按黃帝立四妃象后妃四

祖一作嫫生昌意次妃方雷氏女曰女節生青陽次妃彤魚氏生女夷

人又按漢書古今人表彤魚氏生生二子其後皆有天下其一

夷鼓嫫毋生蒼林不得如謠所說生二子其後皆有天下其一

曰玄囂是為青陽太史公曰據大戴禮以累祖生昌意及玄囂

所生是其所見異也索隱曰玄囂帝魯之祖按皇甫謐乃方雷氏

史云玄囂青陽即少昊也今此紀下云玄囂是為青陽當是誤也

謂二人皆黃帝子並列其名所以前史因誤以玄囂青陽一人

居江水其二曰昌意降居若水永江永若國皆在蜀即所封國

也昌意娶蜀山氏女曰昌僕生高陽高陽有聖德焉正義曰華陽國志及

十三州志云蜀之先肇於人皇之際黃帝與子昌意娶蜀山氏後子孫因封焉帝顓頊高陽氏黃帝之孫昌意之子毋曰昌僕亦謂之女樞河圖云璣光如虹貫月正白感女樞於幽房之宮主顓頊首戴于戈有文德也

帝嚳有四妃卜其子皆有天下元妃有郤氏女曰姜嫄生后稷

次妃有娥氏女曰簡狄生高次妃陳豐氏女曰慶都生放勳次

妃嫫訾氏女曰常義生帝摯帝嚳崩帝摯代立摯在位九年政微弱第唐侯放勳德盛乃禪位焉

唐堯娶散宜氏之女曰女皇生丹朱又有庶子九人皆不肖

虞舜娶堯之二女長娥皇次女英舜升天子娥皇為后女英為

妃娥皇無子女英生商均

夏禹娶塗山氏之女生啓

商湯妃有莘氏之女

周大王娶有郤氏之女曰太姜

詩古公亶父來朝走馬率西水滸至于岐下爰及姜女聿來

胥宇

王季娶摯任氏之中女正義曰國語之摯疇二國任姓奚仲仲也

也

詩摯仲氏任自彼殷商來嫁于周曰嬪于京乃及王季維德

之行太任有身生此文王

思齊太任文王之母思媚周姜京室之婦齊莊姬愛也周姜太姜也京周地也

常思莊敬太任也乃為文王之母又常思愛太姜之配太王之禮故能為京室之婦言其德行純備故生聖子也

列女傳太姜太王娶之以為妃生太伯仲雍王季太姜有色

而貞順率導諸子至於成童靡有過失太王謀事必於太姜

遷徙必與太任王季娶之以為妃太任之性端壹誠莊維德

之行及其有身目不視惡色耳不聽淫聲口不出傲言能以

胎教子而生文王此皆有賢行也

文王娶有莘氏之長女曰太妣

詩文王初載天作之合在洽之陽在渭之涘文王嘉止大邦

有子大邦有子倪天之妹倪譬也知太姒之賢而文定厥祥

問名之後卜而得吉則文王親迎于渭造舟為梁不顯其光

以禮定其吉祥語納幣也于京纘女于莘長子維行天將命文王君天下於周京之地

子造舟周制也殷時未有此等制有命自天命此文王于周

則配文王維德之行篤生武王保佑命爾燮伐大商燮和也

伐殷太姒嗣徽音則百斯男大姒十子衆妾則宜百子也箋

行其善惠于宗公神罔時怨神罔時恫宗公宗神刑于寡妻

至于兄弟以御于家邦刑法也寡妻適妻也

武王娶邑姜服虔曰邑姜武王

論語武王曰予有亂臣十人十人謂周公曰召公奭太公望

官適其一人謂文母劉侍讀以為子無臣母孔子曰才難不

其然乎唐虞之際於斯為盛有婦人焉九人而已

史記武王與叔虞毋會時夢天謂武王曰余命女生子名虞

余與之唐及生子文在其手曰虞故命之曰虞

曲禮天子有后有夫人有世婦有嬪有妻有妾妻八十一御妻

以其御序於王之燕妾賤者疏夫扶也扶持於王婦服也言

其進以服事君子也以其猶貴言齊也言進御於王之時暫有

齊同之義妾之言接也閭彼有禮走而往焉以得接見於君子

也周禮則嬪在世婦上又無妾言之也今此所陳與周禮雜而

不立正妃但三夫人夏則因而廣之增九女則十二人所增九

女者則九嬪也故鄭云春秋說云天子娶十二人夏制鄭又云

殷增三九二十七人總三十九人所謂二十七世婦也周又二

二十七人因為八十一人則女御也○注周禮至賤者正義曰

解周名為女御之義以其御於王之燕寢御女案周禮王有六

寢一正寢餘五在後通為燕寢其一在東北王春居之一在

西北王冬居之一在西南王秋居之一在東南王夏居之一在

中央六月居之九后妃以下更為次序而上御王於五寢之中

也故鄭注周禮九嬪云九御見之法月與后妃其衆也卑者宜

先導者宜後女御八十一人當九夕世婦一十七人當三夕九

嬪九人當一夕三夫人當一夕后當一夕亦十五日而備云自

望后反之婦人上御必有女史彤管以進退之生子月辰則以金

環退之當御者以銀環進之著左手既御著於右手事無大小

成法

帝系后如

三

昏義古者后立六宮三夫人九嬪二十七世婦八十一御妻以聽天下之內治以明章婦順故天下內和而家理天子立六宮三公九卿二十七大夫八十一元士以聽天下之外治以明章天下之男教故外和而國治故天子聽男教后聽女順天子理陽道后治陰德天子聽外治后聽內治教順成俗外內和順國家理治此之謂盛德天子六寢而六宮在後六宮在前所以十人周制也三公以下百二十人似夏制也合而言之取其相應有聖天數也內治婦學之法也陰德謂主陰事陰令也○正義曰案宮人云掌王之六寢之條注路寢一小寢五是天于六寢也云六宮在後者后之六宮在王之六寢之後亦大寢一小寢五其九嬪以下亦分居之其三夫人雖不分居六宮亦分主六宮之事或二宮則一人也或猶如三公分主六卿之類也云內治婦學之法也者按九嬪職云掌婦學之法故知內治是婦學也云陰事謂群妃御見之事陰令為王所求為於北宮也

周官內宰以陰禮教六宮鄭司農云陰禮婦人之禮六宮後五前一王之妃百二十人后一人夫人

三人嬪九人世婦二十七人女御八十一人言謂六宮謂后也婦人稱寢曰宮宮隱蔽之言后象王立六宮而居之亦正寢一燕寢五教者不敢斥言之謂之六宮若今稱皇后為中宮矣以陰禮教六嬪禮不言教夫人世婦者舉中省文也以婦職之法教九御使各有屬以作二事正其服禁其奇衺展其功緒婦事謂緝組紉紵之事九御女御也九御又同事也正其服飾謂後奇衺若今婚道展猶錄也緒業也故書二為三杜子春云當為二二事謂絲枲之屬也大祭祀后裸獻則贊璠爵亦如之謂祭宗廟王既裸而出迎牲后乃從後裸也祭統曰君執圭瓚裸尸大宗執璋瓚亞裸此大宗亞裸謂夫不與而攝耳獻謂王薦腥薦熟后亦從獻也璠爵謂尸卒食王既醢尸后亞獻之其爵以璠為飾正后之服位而詔其禮樂之儀謂房中戶內及祚所立處贊九嬪之禮事助九嬪贊后之事九賓者贊后允賓客之裸獻璠爵皆贊謂王同姓及二王之後來朝親為賓客者裸之禮亞賓謂王而禮賓獻謂王享燕亞王獻賓也璠爵所以亞王酬賓也○記曰陽侯殺穆侯而致后之賓客之禮謂諸侯來朝竊其夫人故大饗廢夫人之禮致后之賓客之禮賓客允喪事佐后使治外內命婦正其服位命婦謂九嬪世婦女御鄭司農云外命婦卿大夫之妻王命其夫后命其婦玄謂士妻亦為命婦允建國佐后立市設其

次置其叙正其肆陳其貨賄出其度量淳制祭之以陰禮市朝

所以建國也建國者以面朝後市王立朝而後立市陰陽相承

之義次司次也叙介次也陳猶處也度丈尺也量豆區之屬鄭

司農云佐后立市者始立市后立之也祭之以陰禮者市中之

社先后所立社也故書淳為敦杜子者讀敦為純純謂幅廣也

制謂四長玄謂純制天子巡狩禮所云制幣丈八尺純四

中音仲歲終則會內人之稍食稽其功事為九御之主优后而受獻

功者比其小大與其應良而賞罰之獻功者九御之屬鄭司農

曰及秋會內宮之財用計夫人以下所用財正歲均其稍食施行功事憲

禁令于王之北宮而糾其守均猶調度也施猶賦也北宮後之

用王之禁令上春詔王后帥六宮之人而生種稷之種而獻

之于王六宮之人夫人以下分居后之六宮者古者使后宮藏

傷敗且以先王耕事共藉郊也鄭司農云先種後熟曰種後種

先熟曰種王當以耕種于籍田玄謂詩云黍稷種稷是也夫人

以下分居后之六宮者每宮九嬪一人世婦三人女御九人其

餘九嬪三人世婦九人女御二十七人從後唯其所燕息焉從

后者五日而沐浴其次又上十五日而編云夫人如三公從容論婦禮

內宰下大夫二人上士四人中士八人府四人史八人胥八

人徒八十人內宰宮中官之長○數內宰對太宰治百官內

宰治婦人之事故名內宰太宰不稱外者謂燕

內統

九嬪掌婦學之法以教九御婦德婦言婦容婦功各帥其屬而

以時御叙于王所婦德謂貞順婦言謂辭令婦容謂婉婉婦功

謂絲枲自九嬪以下九九而御於王所九嬪

者既習於四事又備於從人之道是以教女御也教各率其屬

者使亦九相與從於王所習之燕寢御猶進也勸也進勸王

息亦相次叙○群凡祭祀贊玉盞贊后薦徹豆籩王盞王敦受

妃御見法見曲禮

之而不徹故書王為

玉也杜子春讀為王若有賓客則從后當贊大喪率叙哭者亦

如之亦從治帥猶道也后

哭眾之次序乃哭

世婦掌祭祀賓客喪紀之事帥女宮而濯概為齋盛概拭也為

疏祭祀黍稷春人春之饌人收之皆不及祭之日泣陳女宮之

使世婦此為非春非故是差擇曉然矣

具凡內羞之物房中之羞也掌弔臨于卿大夫之喪王使之

女御掌御叙于王之燕寢言掌御叙防上之專如者于王之燕

使九嬪世婦掌之者謂在上姬 嬖自專之事女御官卑不敢也

以歲時獻功事絲菜成 凡祭祀贊世婦助其帥 大喪掌沐浴及

喪 后之喪持妻 從世婦而弔於卿大夫之喪從

數蓋如使 者之介云

鄭氏曰不列夫人于此官者夫人之於后猶三公之於王

坐而論婦禮無官職世婦不言數者君子不苟於色有婦

德者克之無則闕女御昏義所謂御妻御猶進也侍也

天子聘女納徵加穀珪鄭玄云納徵加於束帛賈公彥曰土以

魯桓公八年祭公來遂逆王后于紀

公羊傳祭公者何天子之三公也何以不稱使據宰周婚禮

不稱主人時王者 遂者何生事也生猶造也 大夫無遂事此

其言遂何據待君命然 成使乎我也以上來無事知成 其成

使乎我奈何使我為媒可則因用是往逆矣納徵請期然後親迎時王者遣祭公來使魯為媒可則

魯往迎之不復成禮疾王者不重妃匹逆天下之母若逆婦

妾將謂海內何哉故識之 女在其國稱女此其稱王后何王

者無外其辭成矣

九年春紀季姜歸于京師

公羊傳其辭成矣則其稱紀季姜何自我言紀父母之於子

雖為天王后猶曰吾季姜明于尊不

襄公十五年劉夏逆王后于齊劉采地夏名也天子卿書字劉

則成故不 言逆女

左氏傳十二年靈王求后于齊齊侯問對於晏桓子桓子對

曰先王之禮辭有之天子求后於諸侯諸侯對曰夫婦所生

若而人不致譽亦不敢 妾婦之子若而人言非 無女而有姊

妹及姑姊妹則曰先守某公之遺女若而人齊侯許昏王使

陰里結之

陰禮周大夫結成也

十五年官師從單靖公逆王后于齊卿

不行非禮也

官師劉夏也天子官師非卿也劉夏獨過魯言夏不書單靖公天子不親婚使上卿逆而公監之

故曰卿不行非禮也

通典說曰禮記昏義云婚禮者將合二姓之好上以事宗

廟下以繼後代也故君子重之共牢而食合盞而酌所以

合禮同尊卑而親之成男女之別立夫婦之義而後父子

親君臣正故曰婚禮者禮之本也公羊說天子至庶人皆

親迎左氏說王者至尊無敵體之義不親迎鄭玄駁之曰

文王親迎于渭則天子敵迎也天子雖尊然夫婦無判禮

同一體所謂無敵豈施於此按禮記哀公問曰冕而親迎

不亦重乎孔子對曰合二姓之好以繼先聖之後以為天

地宗廟社稷之主君何謂已重乎此言繼先聖之後以為

天地之主非天子則誰乎是卿以天子當親迎也杜元凱

以為天子不親迎按春秋祭公逆王后于紀傳曰禮也劉

夏逆王后譏卿不行甘不譏王不親行明是天子不當親

迎也文王之迎太妙身為公子迎在殷代未可據此以為

天子之禮孔子之對哀公自論魯國之法魯以周公之後

得郊祀上帝故以先聖天地為言耳非說天子之禮

漢興因秦之稱號帝母稱皇太后祖母稱太皇太后適稱皇后

師古曰適讀曰嫡后亦君也天子曰皇天地曰后妾皆稱夫人又有美

人良人八子七子長使少使之號焉師古曰良善也七八祿秩

者至武帝制婕妤娥倭充依各有爵位師古曰婕言接幸

而依秩序也婕音接好音千字或從女其音同耳音五經反

俗音而元帝加昭儀之號師古曰昭顯其凡十四等云除皇后

自昭儀以下至昭儀位視丞相爵比諸侯王婕妤視上卿比列

侯嫜娥視中二千石比關內侯師古曰中二千石實得二千石

也師古曰中二千石實得二千石

是為一歲凡得二千一百六俗俸視真二千石比太上造師古

二千石言二千者舉成數耳師古一歲凡得美人視二千石比少上造師古

二千石言二千者舉成數耳師古一歲凡得美人視二千石比少上造師古

日四更第其下亦同師古更克依視千石比左更師古八子視千石比中更師古

視八百石比右庶長師古長使視六百石比五大夫師古日五大少長視四百師古

石比公乘師古日公五官視三百石師古日五官所掌順常視師古

二石石無消共和娛靈保林良使夜者皆視百石師古日消潔師古

所不潔也其讀曰恭言恭順而和柔也娛靈可娛樂情靈也保師古

安也保林言其可安衆如林也良使使令之善也夜者主職夜師古

事令方上家人子中家人子視有秩斗食云師古日家人子者師古

謂之斗食者言一歲不滿百石日食一斗二升五官以下葬司師古

馬門外師古司馬門之外師古高祖呂皇后名雉單父人高祖微時后父呂公相而異之妻以

后生惠帝魯元公主高祖為漢王元年封呂公為臨泗侯高祖

崩孝惠立尊后為皇太后應歷代后之推尊為皇太后太妃者自推尊以後至崩葬事

跡並見太后門此不具錄後同戚姬定陶人愛幸生趙王如意高祖崩為呂后所殺

薄姬吳人初在魏王豹宮中豹亡輸織室高祖幸之生文帝自

有子後希見文帝封代王從之代帝既立尊為皇太后

孝惠張皇后宣平侯敖之女毋魯元公主呂太后欲為重親故

以魯元女配帝為皇后無子惠帝崩皇太后取後宮子立為帝

太后崩大臣誅諸呂及所名孝惠子張后廢處北宮北宮在未央

孝文後元年薨葬安陵不起墳

惠帝納后納采鴈璧乘馬束帛聘黃金二萬斤馬十二匹呂氏

為惠帝娶魯元公主呂氏主女故特優其禮

先公曰魯元婿其弟而不知帝之為人主也惠帝妻其甥而不知妻之爲王后也太上者民之父母如此豈可以奉神靈之統哉蓋人倫顛倒而君道陵夷甚矣

孝文竇皇后觀津人呂太后時以良家子選入宮太后出宮人賜諸王各五人竇姬與至代代王幸之生女嫫及景帝代王王后卒及入爲帝立啓爲太子竇姬爲皇后景帝立尊爲皇太后孝景薄皇后孝文薄太后家女也景帝爲太子時太后取爲太子妃景帝立之爲皇后無寵立六年薄太后崩坐廢廢後四年薨葬長安城東平望亭南

孝景王皇后槐里人初嫁爲金王孫婦母臧氏奪之金以納太子宮景帝爲太子愛幸之生三女及武帝景帝即位廢薄皇后及太子爲臨江王乃立王夫人爲后男爲太子封后父信爲蓋侯武帝即位尊爲皇太后

孝武陳皇后長公主嫫女父陳午武帝得立爲太子長主有力乃取主女爲妃及帝即位爲皇后十餘年無子元光五年坐巫蠱廢居長門宮後十餘年薨葬霸陵即宮亭東

孝武衛皇后字子夫生微爲平陽主謳者帝悅之納宮中元朔元年生男據遂立皇后據爲太子立二十八年遭巫蠱事起太子誅江充發兵敗收后璽綬自殺宣帝立改葬謚思后

孝武李夫人本以倡進兄延年納之宮中得幸生昌邑哀王夫人早卒上憐之以后禮葬及衛思后廢後四年武帝崩大將軍光緣上雅意以李夫人配食追上尊號曰孝武皇后

孝武鈞戈趙婕妤河間人武帝巡狩過河間望氣者言有奇女乃使使召之得幸爲婕妤居鈞戈宮生昭帝後從幸甘泉以譴死昭帝立追尊爲皇太后

孝昭上官皇后祖桀父安隴西上邽人孝昭立召入宮爲婕妤

月餘立為皇后年甫六歲二十歲而昭帝崩昌邑王即位尊為

皇太后時年方十

衛太子史良娣宣帝祖母太子有妃有良娣有孺子妻妾凡三等子皆稱皇孫史良娣家魯國元鼎四年入為良娣生男號史皇孫武帝末巫蠱事起衛太子及良娣史皇孫皆遭害宣帝即位追尊為戾后起園邑史氏侯者四人

史皇孫王夫人宣帝母名翁須太始中得幸於史皇孫皇孫妻妾無號位皆稱家人子征和二年生宣帝帝生數月衛太子皇孫敗家人子皆坐誅莫有收葬者宣帝即位後追尊為悼后起園邑王氏侯者二人

孝宣許皇后父廣漢昌邑人宣帝養於掖庭號皇曾孫廣漢以女妻之生元帝數月宣帝即位立為皇后廣漢封昌成君明年為淳于衍所毒崩在位三年謚恭哀皇后葬杜南是為杜陵南

園

孝宣霍皇后大將軍光女許后崩光納之宮中立為后立五年霍顯與子謀反誅坐廢昭臺宮後十二歲徙雲林館乃自殺葬昆吾亭東

孝宣王皇后父奉光長陵人宣帝即位入宮為婕妤帝憐太子蚤失母幾為霍氏所害乃選後宮素謹慎無子者立王婕妤為后令毋養皇太子立十六年宣帝崩元帝即位為皇太后

孝元王皇后名政君父禁居長安為廷尉吏宣帝時入掖庭為家人子歲餘宣帝令送太子宫見內殿壹幸有身生成帝為皇孫元帝即位以妃為婕妤後三年立為皇后成帝立為皇太后

孝成許皇后平恩侯嘉女元帝悼母恭哀后遭霍氏之禍故選佳女配皇太子成帝即位立為皇后立十四年寵衰坐姊為媚道祝詛廢處昭臺宮後九年坐淳于長等與后姊嬖通書有詩

護賜藥自殺葬延陵交道廐西

孝成班婕妤帝初即位選入後宮始為少使俄大幸為婕妤居增成舍有男後失之鴻嘉三年趙飛燕告許后及班婕妤挾媚道祝詛后坐廢婕妤入求共養太后長信宮至成帝崩婕妤充奉園陵薨因葬園中

孝成趙皇后本長安宮人

師古曰本宮人以賜陽阿主家也宮人者省中副使官婢名曰宮人非天安者以別甘泉等諸宮省也

屬陽阿主家學歌舞號曰飛燕

以其體輕故也成帝見而悅之召入宮大幸有女弟後召入俱為婕妤

許后廢乃立飛燕為皇后而女弟為昭儀姊弟專寵十餘年無子成帝暴崩民間歸咎趙昭儀皇太后詔問皇帝起居發病狀

昭儀自殺哀帝立尊趙皇后為皇太后

孝元傅昭儀哀帝祖母父河內温人昭儀少為上官太后才人

自元帝為太子得進幸帝即位立為婕妤甚有寵生一男一女

男為定陶恭王帝既重傅婕妤及馮婕妤亦幸生中山孝王上

欲殊之為後宮以二人皆有子為王上向在未得稱太后乃更

號曰昭儀賜以印綬在婕妤上昭其儀尊之也至成哀時趙昭

儀董昭儀皆無子猶稱焉元帝崩隨王歸國稱定陶太后恭王

薨子入為漢嗣為哀帝尊為恭皇太后

定陶丁姬哀帝母山陽瑕丘人恭王時姬為後宮生哀帝帝入

嗣漢即位尊為帝太后

孝哀傅皇后定陶太后從弟子哀帝為王時傅太后欲重親取

以配王王入為漢太子傅氏為妃即位立為皇后哀帝崩王莽

奏徙桂宮後月復與孝成趙后俱廢為廢人就其園自殺

孝元馮昭儀平帝祖母元帝即位二年以選入後宮生男為中

山孝王元帝崩隨王之國哀帝立傅太后以素怨誣以罪自殺

中山衛姬平帝母成帝時中山孝王無子上以衛氏子豪少女

配孝王生平帝孝王薨代為王哀帝崩無子太皇太后詔迎中山王立為帝王莽欲顛權徵丁傅行事乃令帝母衛姬及外家不得至京師更立宗室挑鄉侯子成都為中山王奉孝王後賜衛姬璽綬拜為中山孝王后加湯沐邑後以事誅衛氏支屬唯后存莽篡位廢為家人歲餘卒

孝平王皇后安漢公王莽女平帝即位莽以女配帝以禮迎立為皇后歲餘平帝崩莽立孝宣玄孫嬰為孺子尊后為皇太后莽篡以嬰為定安公改后為定安公太后時年十八自劉氏廢每稱疾不朝會莽敬悼哀傷欲嫁之更號為黃皇室主若漢之稱公主后怒發疾不肯起莽不能疆漢兵誅莽后赴火而死

王莽納女為后以固權遣宗正劉宏尚書令平晏納采太師孔光大司徒馬宮等四十九人賜皮并素積皮并鹿皮為冠也素積以十五片布為衣積以禮雜卜筮太牢告宗廟封后父百里尊而不

臣有司奏故事聘皇后黃金二萬斤為錢一萬萬莽深辭讓受四十萬而以其三千三百萬予一十媵家有詔復益二千三百萬合為三千萬莽復以其千萬分予九族貧者遣甄豐奉璽綬拜帝母衛姬為中山孝王后四年春遣大司徒宮等奉乘輿法駕迎皇后于安漢公第授皇后璽綬廣師古曰絃所繫璽登車稱警蹕便時取日時上臨延壽門入未央宮前殿群臣就位行禮大赦天下益封安漢公地滿百里賜迎皇后及行禮者三公以下宰執皆增秩賜金帛各有差皇后立三月以禮見高廟尊父號曰宰衡位在諸侯王之上

班固贊曰易著吉凶而言謙盈之効天地鬼神至于人道靡不同之夫女寵之興繇至微而體至尊窮富貴而不以功此固道家所謂禍福之宗也序自漢興終於孝平外戚後庭色寵著聞二十有餘人然其保位全家者唯文景武

帝太后及邛成后四人而已至如史良娣王悼后許恭哀
后身皆天折不祿而家依託舊恩不敢縱恣是以能全其
餘大者夷滅小者放流嗚呼鑒茲行事變亦備矣

東漢皇后紀叙論秦并天下多自驕大宮備七國史記始皇破六國寫放其

宮室作之咸陽北阪上南臨渭水殿屋復道周閣相通所得諸侯美人以充入之并秦為七也爵列八宮前書曰葉

又因秦之稱號正嫡稱皇后妾皆稱夫人漢興因循其號而婦

又有美人良人八子七子長使少使之號制莫釐釐高祖帷薄不修大戴禮曰大臣坐污穢男女無別者不曰污穢曰帷薄不修謂周昌入奏

事高帝推威孝文衽席無辯鄭玄注禮記曰衽卧席也孝文幸姬是不修也

然而選納尚簡飾翫少華自武元之後世增淫費至乃掖庭三

千增級十四使仔一姪娥二容華三充衣四已上代帝置昭儀

少使十一五官十二常順十三無消共和娛靈外姻亂邦之跡前史載之詳矣及光武中興斷彫為朴六宮稱

號唯皇后貴人貴人金印紫綬奉不過粟數十斛又置美人宮

人采女三等並無爵秩歲時賞賜充給而已漢法常因八月筭

漢儀注曰八月初遣中大夫與掖庭丞及相上於洛陽御中

人為筭賦故曰筭人閱視良家童女年十三以上二十以下姿色端麗合法相者載

還後宮擇視可否乃用登御所以明慎聘納詳求淑哲明帝聿

遵先旨宮教頗修登建嬪后必先令德內無出閫之言權無私

溺之授可謂矯其弊矣向使因設外戚之禁編著甲令改正后

妃之制貽厥方來豈不休哉雖御已有度而防間未薦故孝章

以下漸用色授恩隆好合遂忘緇蠹蠹食木也緇黑也云云見太

故考列行跡以為皇后本紀雖成敗事異而同歸正號者並列

于篇其以私恩追尊非當時所奉者則隨事附出謂安帝母宋

貴人之類並見親屬外事各依列傳其餘無所見則繫之此紀

清河孝王傳以續西京外戚云爾

美人之類是以續西京外戚云爾

光武郭皇后諱聖通真定豪人更始二年光武擊王郎至真定

隣

納后有寵即位以爲貴人建武二年立爲皇后十七年以寵衰
怨對廢爲中山王太后后中山王封二十年中山王徙封沛王后
爲沛太后二十八年薨葬北芒

按西都廢后如薄如陳如霍如許皆幽之別宮至光武
郭后則以有子爲王故得隨子之國然帝在而稱太后
非名也

光烈陰皇后名麗華南陽新野人更始元年帝納后於宛即位
封貴人生顯宗十七年廢皇后郭氏而立貴人制詔三公曰皇
后懷執怨懟數違教令不能撫循它子訓長異室宮闈之內若
見鷹鷂旣無關睢之德而有呂霍之風豈可託以孤幼恭承明
祀其上皇后璽綬陰貴人鄉里良家歸自微賤自我不見于今
三年宜奉宗廟爲天下母主者詳按舊典時上尊號異常之事
非國休福不得上壽稱慶顯宗即位尊爲皇太后

明德馬皇后伏波將軍援之小女世祖時選入太子宫顯宗即
位以爲貴人永平三年立爲皇后肅宗即位尊爲皇太后

賈貴人南陽人建武末選入太子宫生肅宗爲貴人帝旣爲明
德后所養專以馬氏爲外家故貴人不登極位及太后崩乃冊
書加貴人王赤綬諸侯王赤綬也

章德賈皇后扶風平陵人大司徒融之曾孫以選入掖庭建初
三年立爲皇后和帝立尊爲皇太后

梁貴人梁竦女建初中入掖庭生和帝竇后以爲己子忌梁氏
誅竦貴人以憂卒竇后崩上尊號曰恭懷皇后追服喪服葬西
陵

和帝陰皇后光烈皇后兄執金吾識之曾孫永元四年選入掖
庭爲貴人八年立爲后十四年坐祝詛事廢遷桐宮以憂卒立
七年葬臨平亭部

和熹鄧皇后名綏太傅禹之孫永光八年入掖庭為貴人十四
年陰后廢立為皇后帝崩殤帝立尊為皇太后

安思閻皇后名姬河內滎陽人元初元年以選入掖庭為貴人
二年立為皇后諸皇子保廢之帝崩立北鄉侯懿尊為皇太后
安帝宮人李氏生皇子保閻后專房妬忌鸞殺李氏諸廢保為
濟陰王安帝崩立北鄉侯懿懿卒中黃門孫程等迎保立之為
順帝遷閻太后於離宮后崩上李氏尊號曰恭愍皇后葬恭北
陵為策書金匱藏于世祖廟

順烈梁皇后名妘音納納大將軍商之女永建三年入掖庭為

貴人陽嘉元年立為皇后順帝崩冲帝立尊為皇太后

虞美人以良家子選入掖庭生冲帝帝早夭大將軍梁冀秉政
忌惡他族故抑而不登但稱大家而已陳夫人魏郡人少以聲
技入孝王宮得幸生質帝亦以梁氏故榮寵不及熹平四年小

黃門趙祐等言春秋之義母以子貴今冲帝母虞大家質帝母

陳夫人皆誕聖皇而未有稱號夫臣子雖賤尚有追贈之典况

二母見在不蒙崇顯之次無以述尊先世垂示後世也帝感其

言乃拜虞大家為憲陵貴人陳夫人為淳海孝王妃孝王名鴻

使中常侍持節授印綬遣太常以三牲告憲陵懷陵靜陵焉懷陵

冲帝陵靜陵質帝陵

桓帝懿憲梁皇后名女瑩順烈皇后之女弟帝立迎立為皇后

皇太后崩恩愛稍衰延熹三年以恙崩在位十三年葬懿陵其

歲誅梁冀廢懿陵為貴人家

帝既立明年有司奏太后曰春秋迎皇后于紀在塗則稱后

今大將軍冀女弟應昭聖善結昏之際有命既集帝為壽晉

儀欲與后為昏未及而質帝崩帝即位無為后宜備禮進徵幣於是悉依孝惠皇帝

納后故事聘黃金二萬斤納采薦璧乘馬束帛一如舊典

桓帝鄧皇后名猛文和熹皇后從兄子鄧香之女永興中進入掖庭為采女絕幸梁后崩梁冀誅立為后八年坐驕忌廢以憂死立七年葬北邙

桓思竇皇后名妙章德皇后從祖弟孫女延熹八年鄧后廢以選入掖庭為貴人其冬立為皇后帝崩靈帝立尊為皇太后

靈帝宋皇后扶風平陵人肅宗貴人之從曾孫建寧三年選入掖庭為貴人靈帝立為皇后無寵為中常侍王甫及後宮幸

姬等所譖坐廢以憂死

靈帝冊宋貴人為皇后天子御章德殿軒百官陪位太尉襲使持節奉璽紱皇后北面帝南面太尉立階下東向宗正大

長秋西向宗正讀冊文曰惟建寧四年七月乙未制詔皇后

臨天下故有莘與殷姜任母周二代之崇蓋有內德長秋宮闕中宮應位宋貴人垂淑媛之懿體河山之儀威容昭耀德冠後廢群僚所咨人曰宜哉一之著有龜卦得坤乾有司奏議宜稱紱組以毋兆人令使太尉襲使持節奉璽紱宗正祖為

副立貴人為皇后后其性踐璽敬尊禮典肅慎中饋用替厥命求終天祿冊文畢皇后拜稱臣任

位太尉授璽紱中常侍長秋太僕高卿侯覽長跪受璽紱奉

於殿前女使授婕妤遂長跪受以授昭儀受長跪以帶皇后

皇后伏起拜稱臣妾畢黃門鼓吹三通鳴鼓畢群臣以次出

后即位大赦天下皇后秩比國王即位威儀赤紱玉璽也漢制

乘輿黃赤紱四乘黃赤紱細純黃質長二丈九尺九寸太子太后與乘輿同

憲思何皇后南陽宛人家本屠者以選入掖庭風俗通曰漢以

以金帛賂遺主者以求之也生皇子辦拜為貴人

光和三年立為皇后靈帝崩皇子辦即位尊為皇太后

王美人趙國人以良家子選入掖庭生皇子協何后妬而醜之

董卓既廢少帝立協是為獻帝後追尊為靈懷皇后改葬文昭

陵

獻帝伏皇后名壽琅琊東武人大司徒湛之八世孫初平元年

入掖庭為貴人興平二年立為皇后建安十九年為曹操所殺
在位二十年

獻穆曹皇后名節魏公曹操之中女建安十八年操進三女憲
節華為夫人聘以束帛玄纁五萬匹小者待年於國留待年於國
十九年並拜貴人伏皇后殺立節為皇后在位七年帝禪于魏
降于山陽公夫人魏景初元年薨合葬禪陵

范曄論曰漢世皇后無謚皆因帝謚以為稱雖呂氏專政
上官臨制亦無殊號上官昭也中興明帝始建光烈之稱其
後並以德為配至於賢愚優劣混同一貫故馬竇二后俱

稱德焉其餘惟帝之庶母及蕃王乘統以追尊之重特為
其號如恭懷孝崇之比是也初平中蔡邕始追正和熹之

謚蔡邕集議曰漢
是後轉因帝號
行受大名小行受
帝后一體禮亦宜
其安思

順烈以下皆依而加焉

魏因漢法母后之號皆如舊制自夫人以下世有增損太祖建
國始命王后其下五等有夫人有昭儀有婕妤有容華有美人
文帝增貴嬪淑媛脩容順成良人明帝增淑妃昭華脩儀除順
成官太和中始復命夫人登其位於淑妃之上自夫人以下爵
凡十二等貴嬪夫人位次皇后爵無所視淑妃位視相國爵比
諸侯王淑媛位視御使大夫爵比縣公昭儀比縣侯昭華比鄉
侯脩容比亭侯脩儀比關內侯婕妤視中二千石容華視真二
千石美人視比二千石良人視千石

武宣卞皇后琅琊開陽人本倡家年二十太祖納之於譙為妾
生文帝諸子無母者皆令母養之建安二十四年拜為王后文
帝受禪尊為皇太后

文昭甄皇后中山無極人本表熙妻冀州平文帝納之生明帝

皇初二年以怨望賜死明帝即位追謚文德

郭皇后安平廣宗人太祖時得入東宮文帝為太子立為夫人

及踐阼為貴嬪黃初三年立為皇后明帝即位尊為皇太后

明悼毛皇后河內人黃初中以選入東宮明帝即位以為貴嬪

太和元年立為皇后景初元年以愛弛賜死加謚葬愍陵

明元郭皇后西平人世河右大族黃初中本郡反叛遂沒入宮

明帝愛幸之拜為夫人後立為皇后齊王即位尊為皇太后

魏制天子冊后以皮馬庭實嘉鼓珪齊王正始四年立后甄氏其儀不存

晉景獻王皇后名徽瑜泰山南城人景帝納之無子武帝受禪

居弘訓宮號弘訓太后咸寧四年崩 文明王皇后名元姬東

海郟人父肅魏中領軍陵侯歸于文帝生武帝帝受禪尊為皇

太后宮曰崇化初置宮卿重其選以太常諸葛緒為衛尉四年崩

武元楊皇后名艷弘農華陰人父文宗文帝為世子聘之即位

立為皇后有司奏依漢故事皇后太子各食湯沐邑四十縣而帝以非古典不許生惠帝泰始十

年崩葬峻陽陵

泰始中帝博選良家以充後宮先下書禁天下嫁娶使宦者

乘使車給騶騎州郡召充選者使后揀擇后性妬惟取潔白

長大端正美麗者司徒李胤領軍大將軍胡奮廷尉諸葛冲

太僕臧權侍中馮蓀秘書郎左思及世族子女並充三夫人

元嬪之列司冀交豫四州二千石將吏家補良人以下名家

盛族子女多敗衣瘁貌以避之

九年帝多遣良家子女以充內職自擇其美者以絳紗繫臂

平吳之後復納孫皓宮人數千自此掖庭殆將萬人而並寵

-5 215 35 915" data-label="Text">

者甚眾帝莫知所道常乘羊車恣其所之至便宴寢宮人乃取竹葉插戶以鹽汁灑地而引帝車

太始十年將聘三夫人九嬪有司奏禮皇后聘以穀珪無妾
勝禮贄之制曰詔拜授可依魏氏故事於是臨軒使使持節
兼太常拜三夫人兼御史中丞拜九嬪

武悼楊皇后名芷元后從妹父駿以咸寧二年立為皇后惠帝
立尊為皇太后

武帝咸寧二年臨軒遣太尉賈充策立皇后楊氏因大赦賜

王公以下各有差百僚上禮納悼。太康八年有司奏大婚

納徵月玄纁束帛嘉穀珪馬二駟羊鴈酒米如故尚書朱整

故事天子以皮馬
為庭實加以穀珪

儀左貴嬪名芬兄思好學善文名亞於思武帝聞其名納之拜脩

胡貴嬪名芳父奮太始九年納宮中拜貴嬪生武安公主

諸葛夫人名婉琅琊陽都人父冲以泰始九年入宮拜為夫人

惠賈皇后名南風平陽人父充泰始八年冊拜太子妃帝即位
立為皇后干政廢楊太后淫恣在位十一年趙王倫等廢而殺
之

惠羊皇后名獻容泰山南城人曹后既廢孫秀乃立為皇后時
太安元年成都王穎奏廢為庶人陳曠等伐義復后位張方入
洛又廢后大駕幸長安又復永興初又廢河間王顥欲殺后周
馥止之帝崩懷帝立尊為惠皇后居弘訓宮洛陽敗沒於劉曜
曜僭位以為后生二子而死偽謚文獻皇后

先公曰自司馬懿廢齊王芳司馬昭弒高貴鄉公而皆假

太后以為言既以此得成篡矣詎意其後改易詔書黜亮

升駿者后為之也偽立文字弒武悼殺愍懷者后為之也

彼羊后區區一放廢婦人內處宮闈何預世事而今日復

明日廢紛紛未已何耶姦人常懼有假之以舉事如前之

為者是以一人復之則一人廢之至辱於非類而后已哀哉誰實基之

謝夫人名玖父以屠羊為業武帝時入後庭為才人帝以賜太子生皇孫適立為太子拜淑媛及愍懷太子遇害玖亦死懷帝王太后名瑗武帝宮才人生懷帝早卒帝即位追尊曰皇太后

元帝夏侯太妃名光姬沛國譙人琅琊武王為世子納焉生元帝帝嗣位稱王太妃永嘉初薨于江左

元敬虞皇后名孟母濟陽外黃人父豫元帝為琅琊王納為妃無子永嘉六年薨太興三年追冊為皇后

豫章君荀氏元帝宮人生明帝帝即位封建安君成帝立尊重同於太后咸康元年薨

明穆庾皇后名文君潁川郡陵人父珠元帝聘為太子妃明帝

即位立為皇后成帝即位尊為皇太后

晉太康中有司奏太子昏納微用玄纁束帛嘉璧羊馬二駟

東晉太子昏納微禮用玉璧一虎皮二王彪之書曰或者虎取威猛有班彩詩

王象德而有潤珪璋亦玉之類者豹皮彩詩以璧等若子王肅納微辭云玄纁束帛麗皮屬羊前漢亦無用羊之禮鄭氏昏物贊曰羊有祥也婚

之有羊自漢未始

成恭杜皇后名陵陽京兆人鎮南將軍預之曾孫成帝備禮拜

為皇后在位六年崩年二十一

咸康二年帝臨軒遣使持節兼太保領諸葛恢兼太尉護軍孔

愉六禮備物拜皇后杜氏即日入宮帝御太極殿群臣畢賀

禮也王者昏禮禮無其制春秋祭公逆王后于紀穀梁左氏說與公羊又不同而况漢魏遺事闕畧者察晉武惠納后江左又無儀注故成帝將納杜后太常華恒始奠樽土案定其儀據杜元愷左氏傳說王昏是供其昏禮之幣而已又周靈王未昏於齊先儒以為丘明詳錄為王者昏禮故成帝臨軒遣使稱制拜后然其儀注又不具有

章太妃周氏以選入成帝宮生哀帝及海西公拜貴人哀帝即

位詔有司議貴人位號太尉栢温議宜稱夫人尚書僕射江彭
議應曰大夫人詔崇為皇太妃儀服與太后同

康獻褚皇后名蒜子河南陽翟人父哀少以名家入為琅琊王
妃康帝即位立為皇后穆帝即位尊為皇太后

康帝建元元年納后褚氏而儀注陞者不設旄頭殿御史奏
今迎皇后依昔成宮皇后入宮御物而儀注至尊衮冕升殿

毛頭不設昔迎恭皇后惟作青龍旂其餘皆即御物今臨軒
遣使而五牛旗毛頭畢罕並出即用舊制今闕詔曰今所以

正法服升太極者以敬其始故備禮也今何闕所重而撤法
物耶又恭后神主入廟先帝詔后禮宜有降不宜降五牛旗

既不說五旗則毛頭畢罕易具也又詔舊制既難且於今而
備法服儀飾粗舉蕪副雜器停之穆帝永和十年臺符問六

禮板文舊稱皇帝今太后臨朝當何稱博士曹耽云公羊傳

昏禮不稱主人毋命諸父為主傳記裂縵來迎女不稱使太

常王彪之云三傳異議不可全據今皇后臨朝稱制文告所
達國之大典皆仰稟成命非無外事也豈昏聘獨不通乎六

禮板文應稱皇太后詔彪之又曰天子嫁女使同姓之國為

禮也天子之制必禮成而後入臨六宮乎是以祭公來

迎王后于紀使我符又問今后還政不復臨朝當何稱彪之

為媒不云為主云當稱皇帝詔升平元年將納皇后何氏彪之正禮始更六

及諸故事深非公羊曰王者之於四海無不臣妾雖復父兄
婚禮不稱主人之義之親師友之賢皆純臣也夫崇玉綱之始定乾坤之儀安有
天父之尊而稱臣下之命以納伉儷安有臣下之卑而稱天
父之名以行大禮遠尋古禮於義不通按咸寧二年納悼皇
后時弘訓太后臨天下而無命戚屬之臣為武王父兄主婚
之文考咸寧故事不稱父兄師友則咸康華恒所上合於舊

也謂今納后儀制一依咸寧故事從之華恒定六禮云宜依

此恒猶謙前事故王彪之名從咸康由比也唯以娶婦之家

三日不舉樂而成康群臣賀為失禮故但作咸康上禮群臣

賀也其告廟六禮板文等皆彪之所定博士孫納云九六禮

二月博四寸以象四時厚八分以象納採用馬一頭白羊一

口酒十二斛文曰皇帝各前太尉參軍都御史何

公卿咸以為宜率由舊典今使持節參軍都御史何

兼宗正散騎侍郎綜以禮納采后家答曰皇帝嘉命訪昏

族倫數采擇臣之先臣散騎侍郎唯之遺女未閉教訓衣履

若人欽承舊章肅奉典制前太尉將軍都鄉侯糞土臣何

頓首稽顙承制問名用馬羊如前文曰皇帝曰各前某官侯何

首再拜命族重申舊典今使持節某官彪之重宣中詔問臣名族父

名后家答曰皇帝嘉命使者彪之重宣中詔問臣名族父

所生先臣故光祿大夫呼妻侯慎之遺女孫先臣故蔡州

刺史關內侯悼之曾孫先臣故安豐太守關內中侯友之孫

先臣故散騎侍郎雅之遺女外出自於先臣故尚書左丞承

曹之外曾孫先臣故侍中關內侯夷之外孫女年十七欽承

舊章肅奉典制前某官某侯糞土納吉用馬羊酒如前文曰

臣何琦稽顙首頓首再拜承制納吉后家答曰皇帝嘉命使者彪

節其官彪之某官綜以禮納吉后家答曰皇帝嘉命使者彪

之重宣中詔太卜元吉臣陋族

肅奉典制前某官某侯糞土臣

徵用白羊一口玄纁帛三匹絳

-5 225 35 925" data-label="Text">

二匹絹二百匹獸皮二枚錢

二百萬玉璧一枚酒十二斛馬

六駟文曰皇帝曰各某官某

德窈窕之姿如山如河宜奉宗

錢璧以章典禮今使持節某司

尉領太常彫之以禮納徵后家

詔降昏甲陋命以上公寵以豐

典制前某官某侯請期用馬羊

云云再拜承制詔請期用馬羊

公卿大筮元龜罔有不臧率尊

以禮請期后家答皇帝嘉命使

月壬子可迎臣欽奉舊章肅奉

制前某官某侯其再拜承制詔

曰咨前某官某侯何歲吉月令

持節兼太保侍中太宰武陵王

暕重宣中詔令月吉辰備禮以

百兩臣媵儀之族恨承大禮憂

前某官某侯糞土臣其謹因使

者兼某官某侯王暕上謹荅

月皇帝使使持節兼太保侍中

侍郎女何氏為皇后咨爾易本

乾坤詩首闡雅王化之本寔

策皇后文曰惟升平元年八

太宰武陵王暕冊命故散騎

迎用馬羊酒米如初文曰

吉曰唯末率禮以迎今遣使

迎上公宗卿兼至副介近臣

由內輔是故皇英嬪虞帝道以光姪姒母周胤嗣克崇皇后
其祗勗厥德以肅承宗廟虔恭中饋盡敬婦道帥導六宮作
軌儀於四海皇天無親惟德是依可不慎歟

穆章何皇后名法倪廬江瀟人父準升平八年以名家膺選冊
爲皇后無子哀帝即位稱穆皇后居永安宮永興三年崩年六
十六在位四十八年

哀靖王皇后名穆之太原晉陽人司徒左長使濛之女哀帝即
位以王妃立爲皇后無子三年崩

廢帝庾皇后名道伶潁川陽陵人父冰初爲東海王妃王即位
立爲后太和六年崩帝廢追贈爲海西公夫人

簡文宣鄭太后名阿春河南滎陽人先適渤海田氏生一男而
寡元帝納之生簡文帝咸和元年薨簡文即位未及追崇孝武
時追上尊號曰簡文太后

簡文順王皇后名簡姬太原晉陽人父遐遂爲會稽王妃生子
道生失意以憂死孝武帝即位追尊曰順皇后合葬高平陵
孝武文李太后名陵容本出微賤簡文屢失子召幸之生孝武
帝帝即位尊爲淑妃後追爲皇太妃

孝武定王皇后名法慧哀靖皇后之姪父蘊孝武即位納爲后
太元五年崩年二十一葬隆平陵

安德陳皇后名歸女松滋尋陽人孝武時入宮爲淑媛生安恭
二帝後追崇曰太后

安僖王皇后名神愛琅琊臨沂人父獻之初爲太子妃安帝即
位立爲皇后無子義熙八年崩二十九年葬休平陵

恭思褚皇后名靈媛河南陽翟人父爽初爲琅邪王妃恭帝即
位立爲皇后帝禪位降爲零陵王妃宋元嘉十三年崩年五十
三葬中平陵

文獻通考卷之二百五十三



